

明
刊
卷



百五十石之上僧道入粟三百石之上賜六字師號
 都省給之二百石之上四字師號一百石之上二字
 師號禮部給之四川省富實民戶有能入粟赴江陵
 者依河南省補官例行之夫入粟補官雖非先王之
 政然荒札之餘民賴其助者多矣故特識于篇末而
 不敢略云

志卷第四十五上

志卷第四十五下

元史九十七

翰林學士知制誥兼修國史朱湮翰林待制兼直學士知制誥兼國史院編修官兼奉

勅修

食貨五

食貨前志據經世大典為之目凡十有九自天曆以
 前載之詳矣若夫元統以後海運之多寡鈔法之更
 變鹽茶之利害其見於六條政類之中及有司采訪
 事蹟凡有足徵者具錄于篇以備參考而喪亂之際
 其亡逸不存者則闕之

海運



元自世祖用伯顏之言歲漕東南粟由海道以給京師始自至元二十年至于天曆至順由四萬石以上增而為三百萬以上其所以為國計者大矣歷歲既久弊日以生水旱相仍公私俱困疲三省之民力以充歲運之恒數而押運監臨之官與夫司出納之吏恣為貪黷腳價不以時給收支不得其平舛戶貧乏耗損益甚兼以風濤不測盜賊出沒剽劫覆亡之患自仍改至元之後有不可勝言者矣由是歲運之數漸不如舊至正元年益以河南之粟通計江南三省所運止得二百八十萬石二年又令江浙行省及中

正院財賦總管府撥賜諸人寺觀之糧盡數起運僅得二百六十萬石而已及汝穎倡亂湖廣江右相繼陷沒而方國珍張士誠竊據浙東西之地雖縻以好爵資為藩屏而貢賦不供剝民以自奉於是海運之舟不至京師者積年矣至十九年朝廷遣兵部尚書伯顏帖木兒戶部尚書齊履亨徵海運于江浙由海道至慶元抵杭州時達識帖睦爾為江浙行中書省丞相張士誠為太尉方國珍為平章政事詔命士誠輸粟國珍具舟達識帖睦爾總督之既達朝廷之命而方張互相猜疑士誠慮方氏載其粟而不以輸于

京也國珍恐張氏掣其舟而因乘虛以襲已也伯顏帖
木兒白于丞相正辭以責之巽言以諭之乃釋二家
之疑克濟其事先率海舟俟于嘉興之岷浦而平江
之粟展轉以達杭之石墩又一舍而後抵岷浦乃載
于舟海灘淺澁躬履艱苦粟之載于舟者爲石十有
一萬二十年五月赴京是年秋又遣戶部尚書王宗
禮等至江浙二十一年五月運糧赴京如上年之數
九月又遣兵部尚書徹徹不花侍郎韓祺往徵海運
一百萬石二十二年五月運糧赴京視上年之數僅
加二萬而已九月遣戶部尚書脫脫歡察爾兵部尚
書帖木至江浙二十三年五月仍運糧十有三萬石
赴京九月又遣戶部侍郎博羅帖木兒監丞賽因不
花往徵海運士誠託辭以拒命由是東南之粟給京
師者遂止於是歲云

鈔法

至正十年右丞相脫脫欲更鈔法乃會中書省樞密
院御史臺及集賢翰林兩院官共議之先是左司都
事武祺嘗建言云鈔法自世祖時已行之後除撥支
料本倒易昏鈔以布天下外有合支名目於寶鈔總
庫料鈔轉撥所以鈔法疏通民受其利比年以來失

祖宗元行鈔法本意不與轉撥故民間流轉者少致
偽鈔滋多遂准其所言凡合支名目已於總庫轉支
至是吏部尚書僕哲篤及武祺俱欲迎合丞相之意
僕哲篤言更鈔法以楮弊一貫文省權銅錢一千文
為母而錢為子衆人皆唯唯不敢出一語惟集賢大
學士兼國子祭酒呂思誠獨奮然曰中統至元自有
母子上料為母下料為子比之達達人乞養漢人為
子是終為漢人之子而已豈有故紙為父而以銅為
過房兒子者乎一坐皆笑思誠又曰錢鈔用法以虛
換實其致一也今歷代錢及至正錢中統鈔及至元
鈔交鈔分為五項若下民知之藏其實而棄其虛恐
非國之利也僕哲篤武祺又曰至元鈔多偽故更之
尔思誠曰至元鈔非偽人為偽尔交鈔若出亦有偽
者矣且至元鈔猶故戚也家之童稚皆識之矣交鈔
猶新戚也雖不敢不親人未識也其偽及滋多爾况
祖宗成憲豈可輕改僕哲篤曰祖宗法弊亦可改矣
思誠曰汝輩更法又欲上誣世皇是汝又欲與世皇
爭高下也且自世皇以來諸帝皆謚曰孝改其成憲
可謂孝乎武祺又欲錢鈔兼行思誠曰錢鈔兼行輕
重不倫何者為母何者為子汝不通古今道聽塗說

何足以行徒以口舌取媚大臣可乎僕哲篤曰我等策既不可行公有何策思誠曰我有三字策曰行不得行不得又曰丞相勿聽此言如向日開金口河成則歸功汝等不成則歸罪丞相矣脫脫見其言直猶豫未決御史大夫也先帖木兒言曰呂祭酒言有是者有非者但不當坐廟堂高聲厲色若從其言此事終不行耶明日諷御史劾之思誠歸卧不出遂定更鈔之議而奏之下詔去朕聞帝王之治因時制宜損益之方在乎通變惟我世祖皇帝建元之初頒行中統交鈔以錢為文雖鼓鑄之規未遑而錢幣無行之意已具厥後印造至元寶鈔以一當五名曰子母相權而錢實未用歷歲滋久鈔法偏虛物價騰踴姦偽日萌民用匱乏爰詢廷臣博采輿論僉謂拯弊必合更張其以中統交鈔壹貫文省權銅錢一千文准至元寶鈔二貫仍鑄至正通寶錢與歷代銅錢並用以實鈔法至元寶鈔通行如故子母相權新舊相濟上割世祖立法之初意十一年置寶泉提舉司掌鼓鑄至正通寶錢印造交鈔令民間通用行之未久物價騰湧價逾十倍又值海內大亂軍儲供給賞賜犒勞每日印造不可數計舟車裝運軸轆相接交料之散

滿人間者無處無之昏軟者不復行用京師料鈔十錠易斗粟不可得既而所在郡縣皆以物貨相貿易公私所積之鈔遂俱不行人視之若弊楮而國用由是遂乏矣

鹽法

六都之鹽元統二年四月御史臺備監察御史言竊覩京畿居民繁盛日用之中鹽不可闕大德中因商販把握行市民食貴鹽乃置局設官賣之中統鈔一貫買鹽四斤八兩後雖倍其價猶敷民用及泰定間因所任局官不得其人在上者失於鈐束致有短少

之弊於是巨商趨利者營屬當道以局官侵盜爲由輒奏罷之復從民販賣自是鈔一貫僅買鹽一斤無籍之徒私相犯界煎賣獨受其利官課爲所侵礙而民食貴鹽益甚貧者多不得食甚不副朝廷恤小民之意如朝廷仍舊設局官爲發賣庶課不虧而民受賜矣既而大都路備三巡院及大興宛平縣所申又戶部尚書建言皆如御史所陳戶部乃言以謂榷鹽之法本以裕國而便民始自大德七年罷大都運司令河間運司兼辦每歲存留鹽數散之米鋪從其發賣後因富商專利遂於南北二城設局凡十有五處

官爲賣之當時立法嚴明民甚便益泰定二年因局
官網船人等多有侵盜之弊復從民販賣而罷所置
之局未及數載有司屢言富商高擡價直之害運司
所言網船作弊蓋因立法不嚴失於關防所致且各
處俱有官設鹽鋪與商賈販賣並無窒礙豈有京城
之內乃革罷官賣之局宜准本部尚書所言及大都
路所申依舊制於南北二城置局十有五處每局日
賣十引設賣鹽官二員以歲一周爲滿責其奉公發
賣每中統鈔一貫買鹽二斤四兩毋令雜灰土其中
及權衡不得其平凡買鹽過十貫者禁之不及貫者

從所買與之如滿歲無短少失陷及元定分數者減
一界并用之若有侵盜者依例追斷其令賣鹽數令
河間運司分爲四季起赴京厥用官定法物兩平稱
收分給各局其所賣價鈔逐旬起解委本部官輪次
提調之仍委官巡視如有豪強兼利之徒頻買局鹽
而增價轉賣於外者從提調巡督官痛治之仍令運
司嚴督押運之人設法防禁毋致縱令網船人等作
弊其客商鹽貨從便相參發賣四月二十六日中書
省上奏如戶部所擬行之至元三年三月大都京厥
申戶部云近奉文帖起運至元二年京厥發賣食鹽

一萬五千引令兩平稱收如數其實申部除各綱滄
 沒短少鹽計八百四十八引本廠實收一萬四千一
 百五十有二引已支一萬一百引付各局發賣見存
 鹽四千五十有二引支撥欲盡所據至元三年食鹽
 宜依例於河間運司起運一萬五千引赴都庶民間
 食用不關戶部准其所言乃議京廠食鹽今歲宜從
 河間運一萬五千引其腳價蓆索等費令運司於鹽
 課錢內通筭支用仍召募有產業舡戶互相保識每
 一千引為一綱就差各該場官一員并本司奏差或
 監運巡鹽官每名管押一綱於大都興國等場見收

鹽內驗數分派分司官監視如數兩平支收限三月
 內赴京廠交卸取文憑赴部銷照但有雜和沙土濕
 潤短少數並令本綱船戶押運場官奏差監運諸人
 如數均陪依例坐罪中書如戶部所議行之至正三
 年監察御史王思誠侯思禮等建言京師自大德七
 年罷大都鹽運司設官賣鹽置局十有五處泰定二
 年以其不便罷之元統二年又復之迨今十年法久
 弊生在船則有侵盜滲溺之患入局則有和雜灰土
 之奸名曰一貫二斤四兩實不得一斤之上其潔淨
 不雜而斤兩足者唯上司提調數處耳又常白鹽一

千五百引用舡五十艘每歲以四月起運官鹽二萬
引用舡五十艘每歲以七月起運而運司所遣之人
擅作威福南抵臨清北自通州所至以索截河道舟
楫往來無不被擾名爲和顧實乃強奪一歲之中千
里之內凡富商巨賈之載米粟者違官貴人之載家
室者一槩遮截得重賄而放行所拘留者皆貧弱無
力之人耳其舟小而不固滲漏侵盜弊病多端既達
京廩又不得依時交收淹延歲月困守無聊鬻妻子
質舟楫者往往有之此客船所以狼顧不前使京師
百物湧貴者實由於此竊計官鹽二萬引每引腳價

中統鈔七貫總爲鈔三千錠而十五局官典俸給以
一歲計之又五百七十六錠其就支賃房之資短脚
之價蓆草諸物又在外焉當時置局設官但爲民食
貴鹽殊不料官賣之弊反不如商販之賤豈忍徒費
國家而使百物貴也宜從憲臺具呈中書省議罷其
監局及來歲起運之時出榜文播告鹽商從便入京
興販若常白鹽所用船五十艘亦宜於江南造小料
舡處如數造之既成之後付運司顧人運載庶舟楫
通而商賈集則京師百物賤而鹽亦不貴矣御史臺
以其言具呈中書而河間運司所申亦如前議戶部

言運司及大都路講究即同監察御史所言元設監局合准草罷聽從客旅興販其常白鹽繫內府必用之物起運如故宜從都省聞奏二月初五日中書省上奏如戶部所擬行之

河間之鹽至正二年河間運司申戶部云本司歲辦額餘鹽共三十八萬引計課鈔一百一十四萬錠以供國用不爲不重近年以來各處私鹽及犯界鹽販賣者衆蓋因軍民官失於禁治以致侵礙官課鹽法澁滯實由於此乞轉呈都省頒降詔旨宣諭所司依規辦本部具呈中書省遂於四月十七日上奏

旨戒飭之七月又據河間運司申本司辦課全籍郡縣行鹽地方買食官鹽去歲河間等路旱蝗闕食累蒙賑恤民力未蘇食鹽者少又因古北口等處把隘官及軍人不爲用心詰捕大都路所屬有司亦不奉公巡禁致令諸人裝載疙疸鹽於街市賣之或量以斗或盛以盤明相饋送今紫荆關捕獲犯人張狡羣等所載疙疸鹽計一千六百餘斤自至元六年三月迄今犯者將及百起若不申聞恐年終課不如數虛負其咎本部具呈中書省照會樞密院給降榜文禁治之三年又據河間運司申生財節用固治國之常

經薄賦輕徭實理民之大本本司歲額鹽三十五萬引近年又添餘鹽三萬引元簽竈戶五千七百七十四戶除逃亡外止存四千三百有一戶每年額鹽勒令見在疲乏之戶勉強包煎今歲若依舊煎辦人力不足又兼行鹽地方旱蝗相仍百姓焉有買鹽之資如蒙矜閔自至正二年為始權免餘鹽三萬引俟豐稔之歲煎辦如舊本部以錢糧支用不敷權擬住煎一萬引具呈中書省正月二十八日上奏如戶部所擬行之既而運司又言至元三十一年本司辦鹽額二十五萬引自後累增至三十有五萬元統元年又

增餘鹽三萬引已經具呈蒙都省奏准住煎一萬引外有二萬引若依前勒令見戶包煎實為難堪如并將餘鹽二萬引住煎誠為便益戶部又以所言具呈中書省權擬餘鹽二萬引住煎一年至正四年煎辦如故四月十二日上奏如戶部所擬行之

山東之鹽元統二年戶部呈據山東運司准濟南路牒依副達魯花赤完者同知閣里帖木兒所言比大都河間運司改設巡鹽官一十二員專一巡禁本部詳山東運司歲辦鈔七十五萬餘錠行鹽之地周圍三萬餘里止是運判一員豈能遍歷恐私鹽來往侵

礙國課本司既與濟南路講究便益宜准所言中書省令戶部復議之本部言河間運司定設奏差一十二名巡鹽官一十六名山東運司設奏差二十四名今既比例添設巡鹽官外據元設奏差內減去一十二名具呈中書省如所擬行之三年二月又據山東運司備臨朐沂水等縣申本縣十山九水居民稀少元係食鹽地方後因改為行鹽民間遂食貴鹽公私不便如蒙仍舊改為食鹽令居民驗戶口多寡以輸納課鈔則官民俱便抑且可革私鹽之弊運司移文分司并益都路及下滕嶧等州從長講究互言食鹽

為便及准本司運使辛朝列牒云所據零鹽擬依筭菜等處銓注局官給印置局散賣於民非惟大課無虧官釋私鹽之憂民免刑配之罪戶部議山東運司所言於滕嶧等處增置十有一局如登萊三十五局之例於錢穀官內通行銓注局官散賣食鹽官民俱便既經有司講究宜從所議具呈中書省如所擬行之至元二年御史臺據山東肅政廉訪司申准濟南路備章丘縣申見奉山東運司為本司額辦鹽課二十八萬引除客商承辦之外見存十三萬引絕無買者將及年終歲課不能如數所據新城章丘長山鄒

平濟南俱近鹽場與大小清河相接客旅興販宜依
商河滕嶧等處改爲食鹽權派八千引責付本處有
司自備蓆索脚力赴已擬固堤等場於元統三年依
例支出均散於民等事竊照山東運司初無上司明
文輒擅散民食鹽追納課鈔使民不得安業今於至
元元年正月二月兩次奉到中書戶部符文行鹽食
鹽地分已有定例毋得椿配於民本司不遵省部所
行寢匿符文依前差人馳驛督責州縣臨逼百姓追
徵食鹽課鈔不無擾害據本司恣意行事玩法擾民
理應取問緣繫辦課之時宜從憲臺區處又據監察
御史所呈亦爲茲事若便行取問即繫辦課時月具
呈中書省區處戶部議呈行鹽食鹽已有定所宜從
改正若准御史臺所呈取問運司却緣鹽法例應從
長規畫似難別議中書省如所擬行之

陝西之鹽至元二年九月御史臺准陝西行臺咨備
監察御史帖木兒不花建言近蒙委巡歷奉元東道
至元元年各州縣戶口額辦鹽課其陝西運司官不
思轉運之方每年豫期差人分道賫引遍散州縣南
及旬月杖限追鈔不問民之無有竊照諸處運司之
例皆運官召商發賣惟陝西等處鹽司近年散於民

戶且如陝西行省食鹽之戶該辦課二十萬三千一百六十四錠有餘於內鞏昌延安等處認定課鈔一萬六千二百七十一錠慶陽環州鳳翔興元等處歲辦課一萬七千九百八十五錠其餘課鈔先因關陝旱飢民多流亡准中書省咨至順三年鹽課十分爲率減免四分于今三載尚有虧負蓋因戶口凋殘十亡八九縱或有復業者家產已空爾來歲頗豐收而物價甚賤得鈔爲艱本司官皆勒有司徵辦無分高下一槩給散少者不下二三引每一引收價三錠富家無以應辦貧下安能措畫糶終歲之糧不酬一引

之價緩則輸息而借貸急則典鬻妻子縱引目到手力窘不能裝運止從各處鹽商勒價收買舊債未償新引又至民力有限官賦無窮又寧夏所產韋紅鹽池不辦課程除鞏昌等處循例認納軋課從便食用外其池隣接陝西環州百餘里紅鹽味甘而價賤解鹽味苦而價貴百姓私相販易不可禁約以此參詳河東鹽池除撈鹽戶口食鹽外辦課引數今後宜從運官設法募商興販但遇行鹽之處諸人毋得侵擾韋紅鹽法運司每歲分輪官吏監視聽民來取立法抽分依例發賣每引收價鈔三定自黃河以西從民

食用通辦運司元額課鈔因時夾帶至黃河東南者
同私鹽法罪之陝西與販解鹽者不禁如此庶望官
民兩便而課亦無虧矣又據陝西漢中道肅政廉訪
使胡通奉所陳云陝西百姓許食解鹽近脫荒儉流
移漸復正宜安輯而鹽吏不察民瘼止以恢辦爲名
不論貧富散引收課或納錢入官動經歲月猶未得
鹽蓋因地遠脚力艱澁今後若令大河以東之民分
定課程買食解鹽其以西之民計口攤課任食韋紅
之鹽則官不被擾民無蕩產之禍矣且解鹽結之於
風韋紅之鹽產之於地東鹽味苦西鹽味甘又豈肯

舍其美而就其惡乎使陝西百姓一槩均攤解鹽之
課令食韋紅之鹽則鹽吏免巡禁之勞而民亦受惠
矣本臺詳所言鹽法宜從省部定擬具呈中書省送
戶部議之本部議云陝西行臺所言鹽事宜從都省
選官前赴陝西與行省行臺及河東運司官一同講
究是否便益明白咨呈三年都省移咨陝西行省仍
摘委河東運司正官一員赴省一同再行講究三月
初二日陝西行省官及李御史運司同知郝中順會
鞏昌延安興元奉元鳳翔邠州等官與摠帥汪通議
等俱稱當從御史帖木兒不花及廉使胡通奉所言

限以黃河爲界令陝西之民從便食用韋紅二鹽解
鹽依舊西行紅鹽不許東渡其咸寧長安錄事司三
處未散者依已散州縣一體斟酌認納軋課與運司
已散食鹽引價同見納軋課鈔七萬錠通行按季
輸納運司不須散引如此則民不受害而課以無虧
矣郝同知獨言運司每歲辦課四十五萬錠陝西該
辦二十萬錠今止認七萬錠餘十三萬錠從何處恢
辦議不合而散本省檢照運司逐年申報文冊陝西
止辦七萬二千六十餘錠郝遂稱疾不出其後訖無
定論戶部參照至順二年中書省嘗遣兵部郎中井

朝散與陝西行省官一同講究以涇州白家河永爲
定界聽民食用仍督所在軍民官嚴行禁約毋致韋
紅二鹽犯境侵課中書如所擬行之

兩淮之鹽至元六年八月兩淮運司准行戶部尚書
運使王正奉牒本司自至元十四年勅立當時鹽課
未有定額但從實恢辦自後累增至六十五萬七十
五引客人買引自行赴場支鹽場官逼勒竈戶加其
斛面以通鹽商壞亂鹽法大德四年中書省奏准改
法立倉設綱僨運撥袋支發以草前弊本司行鹽之
地江浙江西河南湖廣所轄路分上江下流鹽法通

行至大間煎添正額餘鹽三十萬引通九十五萬七
十五引客商運至揚州東關俱於城河內停泊聽候
通放不下三四十萬餘引積疊數多不能以時發放
至順四年前運使韓大中等又言歲賣額鹽九十五
萬七十五引客商買引關給勘合赴倉支鹽雇船脚
力每引遠倉該鈔十二三貫近倉不下七八貫運至
揚州東關俟候以次通放其舡梢人等恃以鹽主不
能照管視同已物恣爲侵盜弊病多端及事敗到官
非不嚴加懲治莫能禁止其所盜鹽以鈔計之不過
折其舊船以償而已安能如數徵之是以裏河客商
虧陷資本外江興販多被欺侮而百姓高價以買不
潔之鹽公私俱受其害竊照揚州東關城外泇河兩
岸多有官民空閑之地如蒙聽從鹽商自行賃買基
地起造倉房支運鹽袋到槁籍定資次貯置倉內以
俟通放臨期用船載往真州發賣既防侵盜之患可
爲悠久之利其於鹽法非小補也既申中書戶部及
河南行省照勘議擬文移往復紛紜未決久之戶部
乃定議令運司於已收在官客商帶納挑河錢內撥
鈔一萬錠起蓋倉房仍從都省移咨河南行省委官
與運司偕往相視空地果無違礙而後行之

兩浙之鹽至元五年兩浙運司申中書省云本司自
至元十三年初立當時未有定額至十五年始立額
辦鹽十五萬九千引自後累增至四十五萬引元統
元年又增餘鹽三萬引每歲總計四十有八萬每引
初定官價中統鈔五貫自後增為九貫十貫以至三
十五十六十一百今則為三錠矣每年辦正課中統
鈔一百四十四萬錠較之初年引增十倍價增三十
倍課額愈重煎辦愈難兼以行鹽地界所拘戶口有
限前時聽從客商就場支給設立檢校所稱檢出場
鹽袋又因支杏停積延祐七年比兩淮之例改法立

倉綱官押舡到場運鹽赴倉收貯客商就倉支鹽始
則為便經今二十餘年綱場倉官任非其人惟務培
克况淮浙風土不同兩淮跨涉四省課額雖大地廣
民多食之者衆可以辦集本司地界居江枕海煎鹽
亭竈散漫海隅行鹽之地裏河則與兩淮隣接海洋
則與遼東相通番舶往來私鹽出沒侵礙官課雖有
刑禁難盡防禦鹽法隳壞亭民消廢其弊有五本司
所轄場司三十四處各設令丞管勾典史管領竈戶
火丁用工之時正當炎暑之月晝夜不休纔值陰雨
束手彷徨貧窮小戶餘無生理衣食所資全籍工本

稍存抵業之家十無一二有司不體其勞又復差充
他役各場元筴竈戶一萬七千有餘後因水旱疫癘
流移死亡止存七千有餘即今未蒙僉補所據拋下
額鹽唯勒見戶包煎而已若不早爲僉補優加存恤
將來必致損見戶而虧大課此弊之一也又如所設
三十五綱監運綱司專掌召募船戶照依隨場日煎
月辦課額官給水腳錢就場支裝所煎鹽袋每引元
額四百斤又加折耗等鹽十斤裝爲二袋綱官押運
前赴所撥之倉而交納焉客人到倉支鹽如自二月
至於十月河凍之時以運足爲度其立法非不周密

也今各綱運鹽船戶經行歲久奸弊日滋凡遇到場
裝鹽之時私屬鹽場官吏司秤人等重其斤兩裝爲
硬袋出場之後沿途盜賣雜以灰土補其所虧及到
所赴之倉而倉官司秤人又各受賄既不加辨秤盤
又不如法在倉日久又復消折袋法不均誠非細故
不若仍舊令客商就場支給既免綱運俸給水腳之
費又鹽法一新此弊之二也本司歲辦額鹽四十八
萬引行鹽之地兩浙江東凡一千九百六萬餘口每
日食鹽四錢一分八釐總而計之爲四十四萬九千
餘引雖賣盡其數猶剩鹽三萬一千餘引每年督勒

有司驗戶口請買又值荒歉連年流亡者衆兼以瀕
江並海私鹽公行軍民官失於防禦所以各倉停積
累歲未賣之鹽凡九十餘萬引無從支散如蒙早降
定制以憑遵守賞罰既明私鹽減少戶口食鹽不致
廢弛此弊之三也又每季拘收退引凡遇客人運鹽
到所賣之地先湏住報水程及所止店肆繳納退引
豈期各處提調之官不能用心檢舉縱令吏胥坊里
正等需求分例錢不滿所欲則多端留難客人或因
發賣遲滯轉往他所水程雖住引不拘納遂有埋沒
致容姦民蔽匿在家影射私鹽所司亦不檢勘拘收
其懦善者賣過官鹽之後即將引目投之鄉胥又有
狡猾之徒不行納官通同鹽徒執以爲憑興販私鹽
如蒙將有司官吏明定黜降罪名使退引盡實還官
不致影射私鹽此弊之四也本司自延祐七年改立
杭州等七倉設置部轄掌收各網船戶運到鹽袋貯
頓在倉聽候客人依次支鹽俱有定制比年以來各
倉官攢肆其貪欲出納之間兩收其利凡遇網船到
倉必受船戶之賄縱其雜和灰土收納入倉或船戶
運至好鹽無錢致賄則故生事留難以致停泊河岸
侵欺盜賣其倉官與監運人等爲弊多端是以各倉

積鹽九十餘萬引新舊相並充溢廊屋不能支發走
鹵消折利害非輕雖繫客人買過之物課鈔入官實
恐年復一年為患益甚若仍舊令客商自備脚力就
場支裝庶免停積此弊之五也五者之中各倉停積
最為急務驗一歲合賣之數止該四十四萬餘引儘
賣二年尚不能盡又復煎運到倉積累轉多如蒙特
賜奏聞選委德望重臣與拘該官府從長講究參酌
時宜更張法制定為良規惠濟黎元庶望大課無虧
見為住煎餘鹽三萬引差人賫江浙行省咨文赴中
書省請照詳焉戶部詳運司所言除餘鹽三萬引別

議外其餘事理未經行省明白定擬呈省移咨從長
講究六年五月中書省奏選官整治江浙鹽法命江
浙行省右丞納麟及首領官趙郎中等提調既而納
麟又以他故辭至正元年運使霍亞中又言兩淮福
建運司俱有餘鹽已行住免本司繫同一體如蒙依
例住煎三萬引庶大課易為辦集中書省上奏得旨
權將餘鹽三萬引倚閣俟鹽法通行而後辦之二年
十月中書右丞相脫脫平章鐵木兒塔識等奏兩浙
食鹽害民為甚江浙行省官運司官屢以為言擬合
欽依世祖皇帝舊制除近鹽地十里之內令民認買

草罷見設鹽倉網運聽從客商赴運司買引就場支
鹽許於行鹽地方發賣革去派散之弊及設檢校批
驗所四處選任廉幹之人直隸運司如遇客商載鹽
經過依例秤盤均平袋法批驗引目運司官常行體
究又自至元十三年歲辦鹽課額少價輕今增至四
十五萬額多價重轉運不行今戶部定擬自至正三
年爲始將兩浙額鹽量減一十萬引俟鹽法流通復
還元額散派食鹽擬合住罷有旨從之

福建之鹽至元六年正月江浙行省據福建運司申
本司歲辦額課鹽十有三萬九引一百八十餘斤今

查勘得海口等七場至元四年閏八月終積下附餘
增辦等鹽十萬一千九百六十二引二百六十二斤
看詳既有積僨附餘鹽數據至元五年額鹽擬合照
依天曆元年住煎正額五萬引不給工本將上項餘
鹽五萬准作正額省官本鈔二萬錠免致亭民重困
本年止辦額鹽八萬九引一百八十餘斤計鹽十有
三萬九引有奇通行發賣辦納正課際留餘鹽五萬
餘引預支下年軍民食鹽實爲官民便益本省如所
擬咨呈中書省送戶部參詳亦如所擬其下餘鹽五
萬一千九百六十二引發賣爲鈔通行起解回咨本

省從所擬行之至正元年詔福建山東俵賣食鹽病民爲甚行省監察御史廉訪司拘該有司官宜公同講究二年六月江淞行省左丞與行臺監察御史福建廉訪司官及運使常山李鵬舉漳州等八路正官講究得食鹽不便其目有三一曰餘鹽三萬引難同正額擬合除免二曰鹽額大重比依廣海例止收價二錠三曰住罷食鹽並令客商通行福建鹽課始自至元十三年見在鹽六千五百引每引鈔九貫二十年煎賣鹽五萬四千二百引每引鈔十四貫二十五年增爲一錠三十一一年始立鹽運司增鹽額爲七

萬引元貞二年每引增價十五貫大德八年罷運司併入宣慰使司恢辦十年立都提舉司增鹽額爲十萬引至大元年各場煎出餘鹽三萬引四年復立運司遂定額爲十三萬引增價鈔爲二錠延祐元年又增爲三定運司又從權改法建延汀邵仍舊客商與販而福興漳泉四路椿配民食流害迄今三十餘年本道山多田少土瘠民貧民不加多鹽額增重八路秋糧每歲止二十七萬八千九百餘石夏稅不過一萬一千五百餘錠而鹽課十三萬引該鈔三十九萬錠民力日弊每遇催徵貧者質妻鬻子以輸課至無

元史志卷四十五
十三
可規措徃徃逃移他方近年漳寇擾攘亦由於此運
司官耳聞目見蓋因職專恢辦惠無所施如蒙欽依
詔書事意罷餘鹽三萬引革去散賣食鹽之弊聽從
客商八路通行發賣誠爲官民兩便其正額鹽若依
廣海鹽價每引中統鈔二錠宜從都省區處江浙行
省遂以左丞所講究咨呈中書省送戶部定擬自至
正三年爲始將餘鹽三萬引權令減免散派食鹽擬
合住罷其減正額鹽價即與廣海提舉司事例不同
別難更議十月二十八日右丞相脫脫平章帖木兒
達失等以所擬奏而行之

廣東之鹽至元二年御史臺准江南諸道行御史臺
咨備監察御史韓承務建言廣東道所管鹽課提舉
司自至元十六年爲始止辦鹽額六百二十一引自
後累增至三萬五千五百引延祐間又增餘鹽通正
額計五萬五百五十二引竈戶窘於工程官民迫於
催督呻吟愁苦已逾十年泰定間蒙憲臺及奉使宣
撫交章敷陳減免餘鹽一萬五千引元統元年都省
以支持不敷權將已減餘鹽依舊煎辦今已三載未
蒙住罷竊意議者必謂廣東控制海道連接諸蕃船
商輳集民物富庶易以辦納是蓋未能深知彼中事

宜本道所轄七路八州平土絕少加以嵐瘴毒癘其民力耕火種巢顛穴岸崎嶇辛苦貧窮之家經歲淡食額外辦鹽賣將誰售所謂富庶者不過城郭商賈與船舶交易者數家而已竈戶鹽丁十逃三四官吏畏罪止將見存人戶勒令帶煎又有大可慮者本道密邇蠻獠民俗頑惡誠恐有司責辦大嚴歛怨生事所繫非輕如蒙捐此微利以示大信疲民幸甚具呈中書省送戶部定擬自元統三年爲始廣東提舉司所辦餘鹽量減五千引十月初九日中書省以所擬奏聞得旨從之

廣海之鹽至元五年三月湖廣行省咨中書省云廣海鹽課提舉司額鹽三萬五千一百六十五引餘鹽一萬五千引近因黎賊爲害民不聊生正額積虧四萬餘引卧收在庫若復添辦餘鹽困苦未甦恐致不安事關利害如蒙憐憫聞奏除免庶期元額可辦不致遺患邊民戶部議云上項餘鹽若全恢辦緣非元額兼以本司僻在海隅所轄竈民累遭劫掠死亡逃竄民物凋弊擬於一萬五千引內量減五千引以舒民力中書以所擬奏聞得旨從之

四川之鹽元統三年四川行省據鹽茶轉運使司申

至順四年中書坐到添辦餘鹽一萬引外又帶辦兩
浙運司五千引與正額鹽通行煎辦已後支用不闕
再行議擬卑司爲各場別無煎出餘鹽不免勒令竈
戶承認規劃幸已足備以後年分若不申覆誠恐竈
戶逃竄有妨正課如蒙憐憫備咨中書省於所辦餘
鹽一萬引內量減帶辦兩浙之數又准分司運官所
言云四川鹽井俱在萬山之間比之腹裏兩淮優苦
不同又行帶辦餘鹽竈民由此而疲矣行省咨呈中
書省上奏得旨權以帶辦餘鹽五千引倚閣之

茶法

至元二年江西湖廣兩行省具以茶運司同知萬家
閭所言添印茶由事咨呈中書省云本司歲辦額課
二十八萬九千二百餘錠除門攤批驗鈔外數內茶
引一百萬張每引十二兩五錢共爲鈔二十五萬錠
末茶自有官印筒袋關防其零斤草茶由帖每年印
造一千三百八萬五千二百八十九斤該鈔二萬九
千八十餘錠茶引一張照茶九十斤客商興販其小
民買食及江南產茶去處零斤採賣皆須由帖爲照
春首發賣茶由至於夏秋茶由盡絕民間闕用以此
考之茶由數少課輕便於民用而不敷茶引課重數

多止於商旅興販年終尚有停閑未賣者每歲合印
 茶由以上分爲率量添二分計二百六十一萬七千
 五十八斤筭依引目內官鈔每斤收鈔一錢三分八
 釐八毫八絲計增鈔七千二百六十九錠七兩比驗
 減去引目二萬九千七十六張庶幾引不停閑茶無
 私積中書戶部定擬江西茶運司歲辦公據十萬道
 引一百萬計鈔二十八萬九千二百餘錠茶引便於
 商販而山場小民全憑茶由爲照歲辦茶由一千三
 百八萬五千二百八十九斤每斤一錢一分一釐一
 毫二絲計鈔五千八百一十六錠七兩四錢一分減

引二萬三千二百六十四張茶引一張造茶九十斤
 納官課十二兩五錢如於茶由量添二分計二百六
 十一萬七千五十八斤每斤添收鈔一錢三分八釐
 八毫八絲計鈔七千二百六十九錠七兩積出餘零
 鈔數官課無虧而便於民用合准本省所擬具呈中
 書省移咨行省如所擬行之至正二年李宏陳言內
 一節言江州茶司據引不便事云推茶之制古所未
 有自唐以來其法始備國朝既於江州設立推茶都
 轉運司仍於各路出茶之地設立提舉司七處專任
 散據賣引規辦國課莫敢誰何每至十二月初差人

勾集各處提舉司官吏關領次年據引及其到司旬月之間司官不能偕聚吏貼需求各滿所欲方能給付據引此時春月已過及還本司方欲點對給散又有分司官吏到各處驗戶散據賣引每引十張除正納官課一百二十五兩外又取要中統鈔二十五兩名為搭頭事例錢以為分司官吏饋饜之資提舉司雖以權茶為名其實不能專散據賣引之任不過為運司官吏營辦資財而已上行下效勢所必然提舉司既見分司官吏所為若是亦復倣效遷延及茶戶得據還家已及五六月矣中間又存留茶引二三千

本以茶戶消乏為名轉賣與新興之戶每據又多取中統鈔二十五兩上下分派各為己私不知此等之錢自何而出其為茶戶之苦有不可言至如得據在手碾磨方興吏卒踵門催併初限不知茶未發賣何從得錢間有充裕之家必須別行措辦其力薄者例被拘監無非典鬻家私以應官限及終限不能足備上司緊併重複勾追非法苦楚此皆由運司給引之遲分司苛取之過茶戶本圖求利反受其害日見消乏逃亡情實堪憫今若申明舊制每歲正月須要運司盡將據引給付提舉司隨時派散無得停留在庫

三五
多收分例妨誤造茶時月如有過期別行定罪仍不
許運司似前分司自行散賣據引違者從肅政廉訪
司依例糾治如此庶茶司少革貪黷之風茶戶免損
乏之害中書省以其言送戶部定擬復移咨江西行
省委官與茶運司講究如果便益如所言行之



志卷第四十五下

志卷第四十六

元史九十八

翰林學士亞失剌制誥 國史院編修官 王禕 等奉

勅修

兵一

兵者先王所以威天下而折奪姦宄戡定禍亂者也
三代之制遠矣漢唐而下其法變更不一大抵用得
其道則兵力富而國勢強用失其宜則兵力耗而國
勢弱故兵制之得失國勢之盛衰繫焉元之有國肇
基朔漠雖其兵制簡略然自太祖太宗滅夏剪金震
轟風飛奄有中土兵力可謂雄勁者矣及世祖即位

三五
元史卷四十五
一

平川蜀下荆襄繼命大將帥師渡江盡取南宋之地
 天下遂定于一豈非盛哉考之國初典兵之官視兵
 數多寡為爵秩崇卑長萬夫者為萬戶千夫者為千
 戶百夫者為百戶世祖時頗修官制內立五衛以總
 宿衛諸軍衛設親軍都指揮使外則萬戶之下置總
 管千戶之下置總把百戶之下置彈壓立樞密院以
 總之遇方面有警則置行樞密院事已則廢而移都
 鎮撫司屬行省萬戶千戶百戶分上中下萬戶佩金
 虎符符跌為伏虎形首為明珠而有三珠二珠一珠
 之別千戶金符百戶銀符萬戶千戶死陣者子孫襲

爵死病則降一等總把百戶老死萬戶遷他官皆不
 得襲是法尋廢後無大小皆世其官獨以罪去者則
 否若夫軍士則初有蒙古軍探馬赤軍蒙古軍皆國
 人探馬赤軍則諸部族也其法家有男子十五以上
 七十以下無衆寡盡僉為兵十人為一牌設牌頭上
 馬則備戰鬪下馬則屯聚牧養孩幼稍長又籍之曰
 漸丁軍既平中原發民為卒是為漢軍或以貧富為
 甲乙戶出一人曰獨戶軍合二三而出一人則為正
 軍戶餘為貼軍戶或以男子論嘗以二十丁出一卒至元七年
 卒出一卒或以戶論二十戶出一卒而限年二十以上者充

士卒之家爲富商大賈則又取一人曰餘丁軍至十五年免或取匠爲軍曰匠軍或取諸侯將校之子弟充軍曰質子軍又曰禿魯華軍是皆多事之際一時之制天下既平嘗爲軍者定八尺籍伍符不可更易詐增損丁產者覺則更籍其實而以印印之病死戍所者百日外役次丁死陣者復一年貧不能役則聚而一之曰合併貧甚者老無子者落其籍戶絕者別以民補之奴得縱自便者俾爲其主貼軍其戶逃而還者復三年又逃者杖之投他役者還籍其繼得宋兵號新附軍又有遼東之乂軍契丹軍女直軍高麗

軍雲南之寸白軍福建之畬軍則皆不出戍他方者蓋鄉兵也又有以技名者曰砲軍弩軍水手軍應募而集者曰峇刺罕軍其名數則有憲宗二年之籍世祖至元八年之籍十一年之籍而新附軍有二十七年之籍以兵籍係軍機重務漢人不閱其數雖樞密近臣職專軍旅者惟長官一二人知之故有國百年而內外兵數之多寡人莫有知之者今其典籍可考者曰兵制曰宿衛曰鎮戍而馬政屯田站赤弓手急遞鋪兵鷹房捕獵非兵而兵者亦以類附焉作兵志

兵制

太宗元年十一月詔兄弟諸王諸子并衆官人等所屬去處
 僉軍事理有妄分彼此者違魯花赤并官負皆罪之每一
 牌子僉軍一名限年二十以上三十以下者充仍定立千戶
 百戶牌子頭其隱匿不實及知情不首并隱藏逃役軍
 人者皆處死 七年七月僉宣德西京平陽太原陝西五
 路人匠充軍命各處管匠頭目除織匠及和林建宮殿
 一切合干人等外應有回回河西漢兒匠人并札魯花赤
 及札也種田人等通檢丁數每二十人出軍一名 八年七月
 詔燕京路保州等處每二十戶僉軍一名令答不葉兒
 統領出軍真定河間邢州大名太原等路除先僉軍人外

於斡事官忽都虎新籍民戶三十七萬二千九百七
 十二人數內每二十丁起軍一名亦令屬答不葉兒
 領之 十三年八月諭總管萬戶劉黑馬掇斜烈奏
 忽都虎等元籍諸路民戶一百萬四千六百五十六
 戶除逃戶外有七十二萬三千九百一十戶隨路總
 僉軍一十萬五千四百七十一名點數過九萬七千
 五百七十五人餘因近年蝗旱民力艱難徃徃在逃
 有旨今後止驗見在民戶僉軍仍命逃戶復業者免
 三年軍役
 世祖中統元年六月詔罷解鹽司軍一百人初解鹽

司元籍一千鹽戶內每十戶出軍一人後阿藍荅兒
倍其役世祖以重困其民罷之七月以張榮實從南
征多立功命為水軍萬戶兼領霸州民戶諸水軍將
吏河陰路達魯花赤胡玉千戶王端臣軍七百有四
人八柳樹千戶幹來軍三百六十一人孟州龐抄兒
赤張信軍一百九十人濱棗州海口總把張山軍一
百人滄州海口達魯花赤塔刺海軍一百人睢州李
總管麾下孟春等五十五人霸州蕭萬戶軍一百九
十五人悉聽命焉三年三月詔真定彰德邢州洛
磁東平大名平陽太原衛輝懷孟等路各處有舊屬

按札兒字羅突乃解開關不花不里合拔都兒等官
所管探馬赤軍人乙卯歲籍為民戶亦有僉充軍者
若壬寅甲寅兩次僉定軍已入籍冊者令隨各萬戶
依舊出征其或未嘗為軍及蒙古漢人民戶內作數
者悉僉為軍六月以軍士訴貧乏者衆命貧富相兼
應役實有不能自存者優恤三年十月諭山東東路
經畧司益都路匠軍已前曾經僉把者可遵別路之
例俾令從軍以鳳翔府屯田軍人準充平陽軍數仍
於鳳翔屯田勿遣從軍乃國器所管重僉軍九百一
十五人即日放罷為民陝西行省言士卒戍金州者

諸奧魯已嘗服役今重勞苦詔罷之併罷山東大名
河南諸路新僉防城戍卒四年二月詔統軍司及
管軍萬戶千戶等可遵太祖之制令各官以子弟入
朝充秃魯花其制萬戶秃魯花一名馬一十匹牛二
具種田人四名千戶見管軍五百或五百已上者秃
魯花一名馬六匹牛一具種田人二名雖所管軍不
及五百其家富強子弟健壯者亦出秃魯花一名馬
匹牛具種田人同萬戶千戶子弟充秃魯花者挈其
妻子同至從人不拘定數馬匹牛具除定去數目已
上從增餘者聽若有貧乏不能自備者於本萬戶內

不該出秃魯花之人通行津濟起發不得因而科及
衆軍萬戶千戶或無親子或親子幼弱未及成人者以
弟姪充候親子年及十五却行交換若委有親子不
得隱匿代替委有氣力不得妄稱貧乏及雖到來氣
力却有不完者並罪之是月帝以太宗舊制設官分
職軍民之事各有所司後多故之際不暇分別命阿
海充都元帥專於北京東京平灤懿州蓋州路管領
見管軍人凡民間之事毋得預焉五月立樞密院凡
蒙古漢軍並聽樞密節制統軍司都元帥府除遇邊
面緊急事務就便調度外其軍情一切大小公事並

須申覆合設奧魯官並從樞密院設置七月詔免河
南保甲丁壯射生軍三千四百四十一戶雜泛科差
專令守把巡哨八月諭成都路行樞密院近年軍人
多逃亡事故者可於各奧魯內盡實僉補自乙卯年
定入軍籍之數悉僉起赴軍十一月女直水達達及
乞烈賓地合僉鎮守軍命亦里不花僉三千人付塔
匣來領之并達魯花赤官之子及其餘近上處內亦
令僉軍聽亦里不花節制 至元二年八月陝西五
路西蜀四川行省言新僉軍七千人若發民戶恐致
擾亂今鞏昌已有舊軍三千諸路軍二千餘二千人

亦不必發民戶當以便宜起補從之十一月省院官
議收到私走間道盜販馬匹魯過南界人三千八百
四戶悉令充軍以十千九百七十八人與山東路統
軍司一千人與蔡州萬戶餘八百三十六戶有旨留
之軍中 三年七月添內外巡軍外路每百戶選中
產者一人充之其賦令餘戶代輸在都增武衛軍四
百 四年正月僉蒙古軍每戶二丁三丁者一人四
丁五丁者二人六丁七丁者三人二月詔遣官僉平
陽太原人戶為軍除軍站僧道也里可溫答失蠻儒人
等戶外於係官投下民戶運司戶人匠打捕鷹房金

銀鐵冶丹粉錫碌等不以是何戶計驗酌中戶內丁
多堪當人戶僉軍三千人定立百戶牌子頭前赴陝
西五路西蜀四川行中書省所轄東川出征復於京
兆延安兩路僉軍一千人如平陽太原例五月詔河
南路驗酌中戶內丁多堪當軍人戶僉軍四百二十
名歸之樞密院俾從軍復其徭役南京路除邳州南
宿州外依中書省分間定應僉軍人戶驗丁數僉軍
二千五百八十一名管領出征十二月僉女直水達達
軍三千人五年閏正月詔益都李壇元僉軍仍依
舊數充役二月詔諸路奧魯毋隸總管府別設總押

所官聽樞密院節制六月省臣議僉起秃魯花官
皆已遷轉或物故黜退者於內復有貧難蒙古人氏
除隨路總管府達魯花赤總管及掌兵萬戶合令應
當其次官其秃魯花宜放罷其自願留質者聽之十
月禁長軍之官不得侵漁士卒違者論罪十一月僉
山東河南沁遼州城民戶爲軍遇征進則選有力之
家同元守邊城漢軍一體出征其無力之家代守邊
城及屯田勾當六年二月僉懷孟衛輝路丁多人
戶充軍益都淄萊所轄登萊州李壇舊軍內起僉一
萬人差官部領出征其淄萊路所轄淄萊等處有非

李壇舊管者僉五百二十六人其餘諸色人戶亦令酌驗丁數僉軍起遣至軍前赴役十月從山東路統軍司言應係逃軍未獲者令其次親丁代役身死軍人亦令親丁代補無親丁則以少壯驅丁代之七年三月定軍官等級萬戶千戶百戶摠把以軍士為差六月成都府括民三萬一千七十五戶僉義士軍八千六十七人七月分揀隨路砲手軍始太祖太宗征討之際於隨路取發并攻破州縣招收鐵木金火等人匠充砲手管領出征壬子年俱作砲手附籍中統四年揀定人除正軍當役外其餘戶與民一體當

差後為出軍正戶煩難至元四年取元充砲手民戶津貼其間有能與不能者影占不便至是分揀之八年二月以瓜州沙州鷹房三百人充軍九年正月河南省請益兵勅諸路僉軍三萬詔元帥府統軍司總管萬戶府閱實軍籍二月命阿木典行省蒙古軍劉整阿里海牙與漢軍四月詔諸路軍戶驅丁除至元六年前從良入民籍者當差七年後凡從良文書寫從便為民者亦如之餘雖從良並令津助本戶軍役七月閱大都京兆等處探馬赤戶名籍九月詔樞密諸路正軍貼戶及同籍親戚僮奴丁年堪役依

諸王權要以避役者並還之軍惟匠藝精巧者以名
 聞十二月命府州司縣達魯花赤及治民長官不妨
 本職兼管諸軍奧魯各路總管府達魯花赤總管別
 給宣命印信府州司縣達魯花赤長官止給印信任
 滿則別具解由申樞密院十年正月合刺請於渠
 江之北雲門山及嘉陵西岸虎頭山立二戍以其圖
 來上仍乞益兵二萬勅給京兆新僉軍五千人益之
 陝西京兆延安鳳翔三路諸色人戶約六萬戶內僉
 軍六千五月禁乾討虜人其願充軍者於萬戶千戶
 內結成牌甲與大軍一體征進八月禁軍吏之長舉

債不得重取其息以損軍力違者罪之九月襄陽生
 亦軍至都釋械繫免死聽自立部伍評征日本仍於
 蒙古漢人內選官率領之十一年正月初立軍官
 以功陞散官格五月便宜總帥府言本路軍經今四
 十年間或死或逃無丁不能起補見在軍少乞選擇
 堪與不堪丁力放罷貧乏無丁者於民站內別選充
 役從之詔延安府沙井靜州等處種田白達達戶選
 其可充軍者僉起出征六月潁州屯田總管李珣言
 近為僉軍事乞依徐邳州屯田例每三丁內一丁防
 城二丁納糧可僉丁壯七百餘人并元撥保甲丁壯

令珣通領鎮守穎州代見屯納合監戰軍馬別用從
 之十二年三月遣官往遼東僉揀蒙古達魯花赤
 十戶百戶等官子弟出軍詔隨處所置襄陽生券軍
 之為農者或自願充軍具數以聞五月正陽萬戶劉
 復亨言新下江南三十餘城俱守以兵及江北淮南
 潤揚等處未降軍力分散調度不給以致鎮巢軍餘
 州兩處復叛乞僉河西等戶為軍併力勦除庶無後
 患有旨命肅州達魯花赤并遣使同往驗各色戶計
 物力富強者僉起之六月僉平陽西京延安等路達
 魯花赤弟男為軍萊州酒稅官王貞等上言國家討

平殘宋吊伐為事何嘗以賄利為心彼不紹事業小
 人貪圖貨利作乾討虜名目侵掠彼地所得人口悉
 皆貨賣以充酒食之費勝則無益朝廷敗則實為辱
 國其招討司所收乾討虜人可悉罷之第其高下籍
 為正軍命各萬戶管領征進一則得其實用二則正
 王師吊伐之名實為便益從之十四年正月詔上
 都隆興西京北京四路編民捕獮等戶僉選丁壯軍
 二千人防守上都中書省議從各路答配二十五戶
 內取軍一名選善騎射者充官給行資中統鈔一定
 仍有備鞍馬衣裝器仗編立牌甲差官部領前來赴

役十二月樞密院臣言收附亡宋州城新附請糧官
軍并通事馬軍人等軍官不肯存恤多逃散者乞招
誘之命左丞陳巖等分揀堪當軍役者收條充軍依
舊例月支錢糧其生券不堪當軍者官給牛具糧食
屯田種養十五年正月定軍官承襲之制凡軍官
之有功者陞其秩元受之職令他有功者居之不得
令子姪復代陣亡者始得承襲病死者降一等總把
百戶老病死不在承襲之列凡將校臨陣中傷還營
病創者亦令與陣亡之人一體承襲禁長軍之官不
恤士卒及士卒亡命避役侵擾初附百姓者俱有罪

雲南行省言雲南舊屯駐蒙古軍甚少遂取漸島成
丁怯田都等軍以備出征雲南闊遠多未降之地必
須用兵已僉變釋人一萬為軍續取新降落和泥
等入亦令充軍然其人與中原不同若赴別地出征
必致逃匿宜令就各所居一方未降處用之九月併
軍士初至元九年僉軍三萬止擇精銳年壯者不復
問其貧產且無貼戶之助歲久多貧乏不堪樞密院
臣奏宜縱為民遂併為一萬五千諸軍戶授充諸侯
王怯憐口人匠或託為別戶以避其役者復令為軍
有良匠則別而出之樞密臣又言至元八年於各路

軍之為富商大賈者一百四十三戶各增一軍號餘
丁軍今東平莘路諸奧魯總管府言往往人死產乏
不能充二軍乞免餘丁充役者制可十二月樞密院
官議諸軍官在軍籍者除百戶總把權準軍役其元
帥招討萬戶總管千戶或首領官俱合再當正軍一
名十六年正月罷五翼探馬赤重役軍三月括兩
淮造回回驍新附軍五百人及蒙古回回漢人新
附人能造驍者至京師五月淮西道宣慰司官昂吉
兒請招諭亡宋通事軍俾屬之麾下初亡宋多招納
北地蒙古人為通事軍遇之甚厚每戰皆列於前行

効死力及宋亡無所歸朝議欲編入版籍未暇也人

人疑懼皆不自安至是昂吉兒請招集列之行伍以備
征戍從之九月詔河西地未僉軍之官及富強戶有物
力者僉軍六百入十月壽州等處招討使李鐵哥請召
募有罪亡命之人充軍其言使功不如使過始南宋未
平時蒙古諸色人等因得罪皆亡命往依焉今已平定
尚逃匿林藪若釋其罪而用之必能効力無不一當十
者矣十一月罷太原平陽西京延安路新僉軍還籍
十七年七月詔江淮諸路招集峇刺罕軍初平江南募
死士願從軍者號峇刺罕屬之劉萬戶麾下南北既混

一復散之其人皆無所歸率群聚剽掠至是命諸路
招集之令萬奴部領如故聽范左丞李拔都二人節制
十八年二月併貧乏軍人三萬戶爲一萬五千取貼
戶津貼正軍充役四月置蒙古漢人新附軍總管六月
樞密院議正軍貧乏無丁者令富彊丁多貼戶權充正
軍應役驗正軍物力却令津濟貼戶其正軍仍爲軍頭
如故或正軍實係單丁者許傭雇練習之人應役丁多
者不得傭雇軍官亦不得以親從人代之 十九年二月
諸侯王阿只吉遣使言探馬赤軍凡九處出征各與
魯內復徵雜泛徭役不便詔免之并詔有司毋重役

軍戶六月禁長軍之官毋得占役士卒散定海峇刺
罕軍還各營又歸戍城邑十月僉發漸丁軍士違舊
制家止一丁者不作數凡二丁至五丁六丁之家止
存一人餘皆充軍 二十年二月命各處行樞密院
造新附軍籍冊六月從丞相伯顏議所括宋手號軍
八萬三千六百人立牌甲設官以統之十月定出征
軍人亡命之罪爲首者斬餘令減死一等 二十一
年八月江東道僉事馬奉訓言劉萬奴乾討虜軍私
相糾合結爲徒黨張弓挾矢或詐稱使臣莫若散之
各翼萬戶千戶百戶彈甲內管領爲便省院官以聞

有旨可令問此軍欲從脫歡出征虜掠耶欲且放散
 還家耶回奏衆軍皆言自圍襄樊渡江以來與國効
 力願令還家少息遂從之籍亡宋手記軍宋時有是
 軍死則以兄弟若子承代有旨依漢軍例籍之母涅
 其手二十二年正月立行樞密院於江南三省其
 各處行省見管軍馬悉以付焉九月詔福建黃華番軍
 有恒產者放爲民無恒產與妻子者編爲守城軍征
 交趾蒙古軍五百人漢軍一千人除留蒙古軍百人
 漢軍四百人爲鎮南王脫歡宿衛餘悉遣還別以江
 淮行樞密院蒙古軍戍江西十月從月的迷失言以

乾討虜軍七百人籍名數五牌甲命將官之無軍者
 領之十一月御史臺臣言昔宋以無室家壯士爲贖
 軍內附之初有五千入除其占城運糧死亡者今存
 一千一百二十二人此徒山曰性習凶暴民患苦之宜
 給以衣糧使屯田自贍庶幾其獲從之十二月從樞
 密院請嚴立軍籍條例選壯士及有力之家充軍舊
 例丁力強者充軍弱者出錢故有正軍貼戶之籍行
 之既久而強者弱弱者強籍亦如故其同居異居者
 私立年期以相更代故有老稚不免從軍而強壯家
 居者至是革焉江浙省募鹽稅爲軍得四千七百六

十六人選軍官麾下無士卒者相參統之以備各處鎮守
二十四年閏二月樞密院臣言諸軍貼戶有兵軍已死者
有充工匠者放為民者有元係各投下戶回村者似此歇
閑一千三百四十戶乞差人分揀貧富定貼戶正軍制可

二十六年八月樞密院議諸管軍官萬戶千戶百戶等
或治軍有法鎮守無虞鎧仗精完差役均平軍無逃竄
者許所司薦舉以聞不次擢用諸軍吏之長非有土司之
命毋擅離職諸長軍者及蒙古漢軍毋得妄言邊事

成宗大德二年十二月定各省提調軍馬官員凡用權從
軍士蒙古長官三十名次官二十名漢人二十名萬戶千

戶百戶人等俱不得占役行省鎮撫止用聽探外亦不
得多餘役占十一年四月詔禮店軍還屬土番宣慰
司初西川也速迭兒按住奴帖木兒等所統探馬赤軍
自壬子年屬籍禮店隸王相府後王相府罷屬之陝西
省桑哥奏屬土番宣慰司咸以為不便大德十年命
依壬子之籍至是復改屬焉

武宗至大元年正月以通惠河千戶劉粲所領運糧軍九
百二十人屬萬戶赤因帖木爾兵籍十一月丞相三寶奴
等言國制行省佐貳及宣慰使不得提調軍馬若遣授平
章揚州宣慰使阿憐帖木兒者當與成宗同乳母故得行之非

常憲也今命沙的代之宜遵國制勿令提調制可
仁宗皇慶元年三月中書省臣奏李馬哥等四百戶
爲民初李馬哥等四百戶屬諸侯王脫脫乙未年定
籍爲民高麗林衍及乃顏叛皆嘗僉爲軍至元八年
置軍籍以李馬哥等非七十二萬戶內軍數復改爲
民至大四年樞密院復奏爲軍至是省官以爲言命
遵乙未年已定之籍後樞密復奏竟以爲軍戶十二
月省臣言先是樞密院奏雲南省宜遵各省制其
省官居長者一負得佩虎符提調軍馬餘佐貳者不
得預已受虎符者悉收之本雲南省言本省籍軍士

之力以辦集錢穀遇有調遣則省官親率衆上馬故
舊制雖牧民官亦得佩虎符領軍務視他省爲不同
臣等議已受虎符者依故事未受者宜頒賜之制可
二年正月詔雲南省鎮遠方掌邊務凡事涉軍旅
者自平章至僚佐須同署押其長官二負復與哈必
赤 延祐元年二月四川省軍官闕負詔依民官遷
調之制差人與本省提調官及監察御史同銓注
三年三月命伯顏都萬戶府及紅胖襖總帥府各調
軍九千五百人往諸侯王所更代守邊士卒其屬都
萬戶府者軍一名馬三匹屬總帥府者軍一名馬二

元史卷四十六
匹令人自為計其貧不能自備者則命行伍之長及
百戶千戶等助之悉遣精銳練習騎射之士每軍一
百名百戶一員五百名千戶一員復命買住囊加解
二人分左右部領之

志卷第四十六

元史卷第四十七

元史九十九

翰林學士亞大知制誥雷修國史臣宋濂
翰林待制承直郎同知制誥雷國史院編修官王禕等奉

敕修

兵二

宿衛

宿衛者天子之禁兵也元制宿衛諸軍在內而鎮戍
諸軍在外內外相維以制輕重之勢亦一代之良法
哉方太祖時以木華黎赤老温博尔忽博尔木為四
怯薛領怯薛之分番宿衛及世祖時又設五衛以象
五方始有侍衛親軍之屬置都指揮使以領之而其

後增置改易於是禁兵之設殆不止於前矣夫屬橐
鞬列宮禁宿衛之事也而其用非一端用之於大朝
會則謂之圍宿軍用之於大祭祀則謂之儀仗軍車
駕巡幸用之則曰扈從軍守護天子之帑藏則曰看
守軍或夜以之警非常則為巡邏軍或歲漕至京師
用之以彈壓則為鎮遏軍今總之為宿衛而以餘者
附見焉

四怯薛 太祖功臣博爾忽博爾木木華黎赤老温
時號撥里班曲律猶言四傑也太祖命其世領怯薛
之長怯薛者猶古番直宿衛也凡宿衛每三日而一

更申酉戌日博爾忽領之為第一怯薛即可恃
博爾忽早絕太祖命以別速部代之而非四傑功臣
之類故太祖以自名領之其云也可者言天子自領
之故也亥子丑日博爾木領之為第二怯薛寅卯辰
日木華黎領之為第三怯薛巳午未日赤老温領之
為第四怯薛赤老温後絕其後怯薛常以右丞相領
之凡怯薛長之子孫或由天子所親信或由宰相所
薦舉或以其次序所當為即襲其職以掌環衛雖其
官卑勿論也及年勞既久則遂擢為一品官而四怯
薛之長天子或又命大臣以總之然不常設也其它

預怯薛之職而居禁近者分冠服弓矢食飲文史車馬廬帳府庫醫藥卜祝之事悉世守之雖以才能受任使服官政貴盛之極然一日歸至內庭則執其事如故至於子孫無改非甚親信不得預也其怯薛執事之名則主弓矢鷹隼之事者曰火兒赤昔寶赤怯憐赤書寫聖旨曰扎里赤為天子主文史者曰必闌赤親烹飪以奉上飲食者曰博爾赤侍上帶刀及弓矢者曰云都赤開端赤司閽者曰八刺哈赤掌酒者曰荅刺赤典車馬者曰兀刺赤莫倫赤掌內府尚供衣服者曰速古兒赤牧駱駝者曰帖麥赤牧羊者曰

火你赤捕盜者曰忽刺罕赤奏樂者曰虎兒赤又名忠勇之士曰霸都魯勇敢無敵之士曰拔突其名類蓋不一然皆天子左右服勞侍從執事之人其分番更直亦如四怯薛之制而領於怯薛之長若夫宿衛之士則謂之怯薛歹亦以三日分番入衛其初名數甚簡後累增為萬四千人揆之古制猶天子之禁軍是故無事則各執其事以備宿衛禁庭有事則惟天子之所指使比之樞密各衛諸軍於是為尤親信者也然四怯薛歹自太祖以後累朝所御幹耳朶其宿衛未嘗廢是故一朝有一朝之怯薛總而計之其數

滋多每歲所賜鈔幣動以億萬計國家大費每敝於此焉

右衛 中統三年以侍衛親軍都指揮使董文炳兼山東東路經畧使共領武衛軍事命益都行省大都督撒吉思驗壬子年已定民籍及照李璫總籍軍數每千戶內選練習軍士二人充侍衛軍并海州東海漣州三處之軍屬焉至元元年改武衛為侍衛親軍分左右翼置都指揮使八年改立左右中三衛掌宿衛扈從兼屯田國有大事則調度之

左衛

中衛 並至元八年侍衛親軍改立

前衛 至元十六年以侍衛親軍創置前後二衛掌宿衛扈從兼管屯田國有大事則調度之置都指揮使

後衛 亦至元十六年置

武衛 至元二十五年尚書省奏那海那的以漢軍一萬人如上都所立虎賁司營屯田脩城隍二十六年樞密院官暗伯奏以六衛六千人塔刺海孛可所掌大都屯田三千人及近路迤南萬戶府一千人總一萬人立武衛親軍都指揮使司掌脩治城隍及京

師內外工役之事

左都威衛 至元十六年世祖以新取到侍衛親軍一萬戶屬之東宮立侍衛親軍都指揮使司三十一年復以屬皇太后改隆福宮左都威衛使司至大三年選其軍之善造作者八百人立千戶所一及百戶翼八以掌之而分局造作皇慶元年以王平章舊所領軍一千人立屯田至治三年罷匠軍千戶所

右都威衛 國初木華黎奉太祖命收扎剌兒兀魯忙兀納海四投下以按察兒孛羅笑乃解不里海拔都兒闊闊不花五人領探馬赤軍既平金隨處鎮守

中統三年世祖以五投下探馬赤立蒙古探馬赤總管府至元十六年罷其軍各於本投下應役十九年仍令克軍二十一年樞密院奏以五投下探馬赤軍俱屬之東宮後置官屬如舊二十二年改蒙古侍衛親軍指揮使司三十一年改隆福宮右都威衛使司唐兀衛 至元十八年阿沙阿東言今年春奉命總領河西軍三千人但其所帶虎符金牌者甚衆征伐之重若無官署何以防閑之樞密院以聞遂立唐兀衛親軍都指揮使司以總之

貴赤衛 至元二十四年立

西域親軍 元貞元年依貴赤唐兀二衛例始立西域親軍都指揮使司

衛候直都指揮使司 至元元年裕宗招集控鶴一

百三千五人三十一年徵政院增控鶴六十五人立

衛候司以領之且掌儀從金銀器物元貞元年皇太

后復以晉王校尉一百人隸焉大德十一年益以懷

孟從行控鶴二百人陞衛候直都指揮使司至大元

年復增控鶴百人總六百人設百戶所六以為其屬

至治三年罷之四年以控鶴六百三十人歸于皇后

位下後復置立

右阿速衛 至元九年初立阿速拔都達魯花赤後

招集阿速正軍三千餘名復選阿速揭只揭了温怯

薛丹軍七百人扈從車駕掌宿衛城禁兼營潮河蘇

沽兩川屯田并供給軍儲二十三年為阿速軍南攻

鎮巢殘傷者眾遂以鎮巢七百戶屬之并前軍總為

一萬戶隸前後二衛至大二年始改立右衛阿速親

軍都指揮使司

左阿速衛 亦至大二年改立

隆鎮衛 睿宗在潛邸嘗於居庸關立南北口屯軍

徵巡盜賊各設千戶至元二十五年以南北口上

千戶所總領之至大四年改千戶所為萬戶府分欽察唐兀貴赤西域左右阿速諸衛軍三千人并南北口六和嶺舊隘漢軍六百九十三人屯駐東西四十三處立十千戶所置隆鎮上萬戶府以統之皇慶元年始改為隆鎮衛親軍都指揮使司延祐二年又以哈兒魯軍千戶所隸焉至治元年置蒙古漢軍籍

左衛率府 至大元年命以中衛兵萬人立衛率府屬之東宮時仁宗為皇太子曰世祖立五衛象五方也其制猶中書省之六部殆不可易遂命江南行省萬戶府選漢軍之精銳者一萬人為東宮衛兵立衛率

府延祐元年改為忠翊府未幾復改為御臨親軍都

指揮使司又以御臨非古典改為羽林六年英宗立

為皇太子復以諱東宮仍為左衛率府

右衛率府 延祐五年以詹事禿滿迭兒所管速怯

那兒萬戶府及迤東女直兩萬戶府右翼屯田萬戶

府兵合為右衛率府諱皇太子位下

康禮衛 武宗至大三年定康禮軍籍凡康禮氏之

非者皆別而黜之驗其實始得入籍及諸侯王阿只

吉火郎撒所領探馬赤屬康禮二者今樞密院康禮

衛遣人乘傳往置籍焉

忠翊侍衛 至元二十九年始立屯田府大德十一年增軍數立爲大同等處侍衛親軍都指揮使司至大四年四月皇太后修五臺寺遂移屬徽政院并以京兆軍三千人增入延祐元年改中都威衛使司仍隸徽政院至治元年始改爲忠翊侍衛親軍都指揮使司

宗仁衛 至治二年右丞相拜住奏先脫別鐵木叛時汝入亦乞列思人一百戶與令所收蒙古子女三千戶清州徽匠二千戶合爲行軍五千請立宗仁衛以統之於是命右丞相拜住總衛事給降虎符牌而

如右衛率府又置行軍千戶所隸焉

右欽察衛 至元二十三年依河西等衛例立欽察衛至治二年分爲左右兩衛天曆二年以本衛屬大都督府

左欽察衛 亦至治二年立始至元中立衛時設行軍千戶十有九所屯田三所太德中置只兒哈郎鐵哥納兩千戶所至大元年復設四千戶所至是始分爲左右二衛亦屬大都督府

龍翊侍衛 天曆元年十二月立龍翊衛親軍都指揮使司以左欽察衛唐吉失等九千戶隸焉

虎賁親軍都指揮使司

左翊蒙古侍衛親軍都指揮使司

右翊蒙古侍衛親軍都指揮使司

宣忠幹羅思扈衛親軍都指揮使司

威武阿速衛親軍都指揮使司

東路蒙古侍衛親軍都指揮使司

女直侍衛親軍萬戶府

高麗女直漢軍萬戶府管女直侍衛親軍萬戶府

鎮守海口侍衛親軍屯儲都指揮使司

宣鎮侍衛

世祖中統元年四月諭隨路管軍諸將力有裨從萬戶

三哥西征軍人悉遣至京師克防城軍忙古解軍三

百一十九人嚴萬戶軍一千三百四十五人濟南路

軍一百四十人脫赤刺軍一百四十九人紇查刺軍

一百四十五人馬總管軍一百四十四人三年十

月諭益都大小管軍官及軍人等先李瓊懷逆蒙蔽

朝廷恩命驅駕爾等以為已惠爾等雖有效過功勞

殊無聞報一旦泯絕此非爾等不忠之愆實李瓊懷

逆之罪也今侍衛親軍都指揮使董文炳來奏其詳

言爾等各有願為朝廷出力之語此復見爾等存忠

之夕也今命董文炳仍為山東東路經畧使收集爾等直隸朝廷克武衛軍近侍勾當比及應職且當守把南邊隄防外隙廢內境軍民各得安業爾等宜益盡心以圖勲效 至元二年十二月增侍衛親軍一萬人內選女直軍三千高麗軍三千阿海三千益都路一千每千人置千戶一員百人置百戶一員以領之仍選丁力壯銳者以應役焉 三年五月帝謂樞密臣曰侍衛親軍非朕命不得發克夫役修瓊華島士卒即日放還 四年七月諭東京路宣撫司命於所管戶內以十等為率於從上第三等戶僉選侍

衛親軍一千八百名若第三等戶不敷於第二等戶內僉補仍定立千戶百戶牌子頭并其家屬同來赴中都應役 十四年五月以蒙古軍與漢軍相參備都城內外及萬壽山宿衛仍以也速不花領圍宿事十五年五月總管胡翔請選侍衛軍先是宿州蘄縣等萬戶府士卒百人有旨俾克侍衛軍後從僉省嚴忠範征西川既而嘉定重慶夔府皆下忠範回軍留西道翔上言從之九月以總管張子良所匿軍二千二百三十二人克侍衛軍士 十六年四月選揚州省新附軍二萬人克侍衛親軍併其妻子遷赴京

師 二十四年十月總帥汪惟和選麾下銳卒一千人請擇昆弟中一人統之以備侍衛從之

成宗元貞四年八月詔蒙古侍衛所管探馬赤軍人

子弟投克諸王位下身役者悉遵世祖成憲發還元

役克軍 大德六年二月調蒙古侍衛等軍一萬人

往官山住夏

仁宗延祐六年九月知樞密院事塔失鐵木兒言諸

漢人不得點圍宿軍士圖籍係軍數者雖御史亦不

得預知此國制也比者領圍宿官言中書命司計李

處恭巡視守倉庫軍卒有曠役者則罪之以懲其後

使無怠而已而李司計擅取軍數蕃士卒在法為過

臣等議宜自中書與樞密造人案之驗實以聞制可

七年六月以紅城中郡威衛係掌軍務之司屬徽政

院不便命遵舊制俾樞密總之

圍宿軍

世祖至元二十六年七月命大都侍衛軍內復起一

萬人赴上都以備圍宿

成宗元貞二年十月樞密院臣言昔大朝會時皇城

外皆無墻垣故用軍環繞以備圍宿今墻垣已成南

北西三畔皆可置軍獨御酒庫西地窄不能容臣等

與丞相完澤議各城門以蒙古軍列衛及於周橋南
置戍樓以警昏旦從之

武宗至大四年正月省臣等傳皇太子命以大朝會
調蒙古漢軍三萬人偸圍宿仍遣使祭山東河北河
南淮北諸路軍至京師復命都府左右翼右都威衛
整器仗車騎六月以諸侯王駙馬等來朝命發各衛
色目漢軍八百二十六人至上京復命指揮使也干
不花領之

仁宗皇慶元年六月命衛率府軍士偸圍宿守隆福
宮內外禁門十一月樞密院臣言皇太后有旨禁掖

門可嚴守衛臣等議增置百戶一員及於欽察貴赤

西域唐兀阿速等衛調軍士九十人增守諸掖門復
命千戶一員帥領百戶一員偸巡邏從之 延祐三

年十月以諸侯王來朝命圍宿軍士六千人增至一
萬人復命也了干禿魯分左右部領其事十一月詔

圍宿軍士除舊有者更增色目軍萬人以偸禁衛十
二月樞密院臣言圍宿軍士不及數其已發各衛者

地遠至不能如期可遷刈葦草及青塔寺工役軍先
備守衛其各衛還家軍士亦發二萬五千人令備車

馬器械俱會京師制可 六年閏八月命知樞密院

事衆嘉領圍宿務五衛軍代羽林軍士仍以千戶二
員百戶十員擇士卒精銳者二百人屬之

英宗至治元年正月帝詣石佛寺以其墻垣踈壞命
副樞木溫台僉院阿散領圍宿士卒以備巡邏八月
東內皇城建宿衛屋二十五楹命五衛內摘軍二百
五十八居之以備禁衛

文宗天曆二年二月樞密院臣言去歲嘗奉旨依先
制調軍守把圍宿此時各翼軍人皆隨處出征亦有
潰散者故不及依次調遣止於右翼侍衛及右都歲
衛內發軍一千一百二十六名以備圍宿今歲車駕

行幸臣等議於河南山東兩都府內起遣未差軍士
一千三名以備扈從制可五月樞密臣又言比奉令
旨放散軍人臣等議常制以三月一日放散六月一
日赴限今放散既遲可令於八月一日赴限從之

儀仗軍

世祖至元十二年十二月上尊號受冊告祭天地宗
廟調左右中三衛軍五十人為蹕街清路軍

武宗至大二年十二月上尊號百官行朝賀禮樞密
院調軍一千人備儀仗三年十月上皇太后尊號
行冊寶禮用內外儀仗軍數及防護五色甲馬軍二

元史卷之三十三
百八
四年二月合祭天地太廟社稷用蹕街清道
及守內外境門軍一百八十人命以圍宿軍爲之事
畢還役七月以奉迎武宗玉冊柎廟用清路蹕街軍
一百五十人管軍千戶百戶各一員九月以祭享太
廟用蹕街清路軍一百五十人千戶百戶各一員
仁宗皇慶元年三月天壽節行禮用內外儀仗軍一
千人

英宗至治元年十一月命有司選控鶴衛士及色目
漢軍以備鹵簿儀仗十二月定鹵簿隊仗用軍士二
千三百三十人萬戶千戶百戶四十五員仍議用軍
士一千九百五十人萬戶千戶百戶五十九員以備
儀仗

致和元年六月以享太廟用蹕街清路軍一百名看
糝盆軍一百名管軍官千戶百戶各一員九月行大
禮用擎執儀仗蒙古漢軍一千名

文宗天曆元年十一月親祭太廟內外用儀仗并五
色甲馬軍一千六百五十名仍命指揮青山及洪副
使攝折衝都尉提調二年正旦行禮用儀仗軍一
千人享太廟用蹕街清路軍一百名看守糝盆軍一
百名管軍千戶百戶各一員天壽節行禮用儀仗軍

一千名皇后冊寶擊執儀仗用軍一千二百名軍官
四員

扈從軍

世祖至元十七年三月發忙古解抄兒赤所領河西
軍士及阿魯黑麾下二百人入備扈從
武宗至大二年太后將幸五臺徽政院官請調軍扈
從省臣議昔大太后嘗幸五臺於住夏探馬赤及漢
軍內各起扈從軍三百人今遵故事從之十一月樞
密院臣言去歲六衛漢軍內以諸廄興建工役故用
六千軍士於上都臣等議來歲車駕行幸復令騎卒
六千人備車馬器仗與步卒二千人扈從制可

看守軍

世祖至元二十五年十一月以軍守都城外倉初大
都城內倉敖有軍守之城外豐潤豐實廣貯通濟四
倉無守者至是收糧頗多丞相桑哥以爲言乃依都
城內倉例每倉發軍五人守之十二月中書省臣言
樞密院公廨後有倉貯糧乞調軍五人看守從之
成宗大德四年二月調軍五百人於新浚河內看闡
武宗至大四年六月帝御大安閣樞密院官奏嘗奉
旨令各門置軍守備臣等議探馬赤軍士去其所戍

地遠卒莫能至擬發阿速唐兀等軍參漢軍用之各
何置五十人制可

仁宗延祐元年閏三月隆禧院官言初世祖影殿有
軍一守之今武宗御容於大崇恩福元寺安置宜依
例調軍守衛從之 三年二月嶺北省乞軍守衛倉
庫命於五漢所屬萬戶三千探馬赤軍內摘軍三百
人與之

英宗至治元年增守太廟墻垣軍初以衛士軍人共
守圍宿故上用蒙古軍四百人至是以衛士守內
垣其外墻止用軍士乃增至八百人復命僉哈散

院判阿刺鐵木兒領之四月敕撈思吉幹節兒八哈
失寺內常令軍士五人守衛

巡邏軍

仁宗皇慶元年三月丞相鐵木迭兒奏每歲既幸上
京於各宿衛中留衛士三百七十人以備巡邏今歲
多盜賊宜增百人以嚴守禦制可仍命樞密與中書
分領之 延祐七年五月詔留守司及虎賁司官親
率衆於夜巡邏

鎮遏軍

仁宗延祐元年閏三月樞密院官奏中書省言江淅

春運糧八十三萬六千二百六十石取日開洋前來
直沽請預差軍人鎮遏詔依年例調軍一千名命右
衛副都指揮使伯顏往鎮遏之三年四月海運至
直沽樞密院官奏今歲軍數不敷乞調軍士五百人
巡鎮從之七年四月調海運鎮遏軍一千人如舊
制

鎮戍

元初以武功定天下四方鎮戍之兵亦重矣然自其
始而觀之則太祖太宗相繼以有西域中原而攻取
之際屯兵蓋無定向其制殆不可考也世祖之時海

宇混一然後命宗王將兵鎮邊徼襟喉之地而河洛
山東據天下腹心則以蒙古探馬赤軍列大府以屯
之淮江以南地盡南海則名藩列郡又各以漢軍及
新附等軍戍焉皆世祖宏規遠略與二三大臣之所
共議達兵機之要審地理之宜而足以貽謀於後世
者也故其後江南三行省嘗以遷調戍兵為言當時
莫敢有變其法者誠以祖宗成憲不易於變更也然
卒之承平既久將驕卒惰軍政不修而天下之勢遂
至於不可為夫豈其制之不善哉蓋法久必弊古今
之勢然也今故著其調兵屯守之制而列之為鎮戍

焉

世祖中統元年五月詔漢軍萬戶各於本管新舊軍
內摘發軍人備衣甲器仗差官領赴燕京近地屯駐
萬戶史天澤一萬四百三十五人張馬哥二百四十
人解成一千七百六十人紇叱刺四百六十六人斜
良拔都八百九十六人扶溝馬軍奴一百二十九人
內黃鐵木兒一百四十四人趙奴懷四十一人鄢陵
勝都古六十五人十一月命右三部尚書怯烈門平
章政事趙璧領蒙古漢軍於燕京近地屯駐平章塔
察兒領武衛軍一萬人屯駐北山漢軍質子軍及會
到民間諸投下軍於西京宣德屯駐復命怯烈門為
大都督管領諸軍勾當分達達軍為兩路一赴宣德
德興一赴興州其諸萬戶漢軍則令赴潮河屯守後
復以興州達達軍合入德興宣德命漢軍各萬戶悉
赴懷來縉山川中屯駐三年十月詔田德實所管
固安質子軍九百十六戶及平灤州劉不里刺所管
質子軍四百戶還元管地面屯駐至元七年以金
州軍八百隸東川統軍司還成都忽朗吉軍戍東川
十一年正月以忙古帶等新舊軍一萬一千人戍建
都調襄陽府生券軍六百人熟券軍四百人由京兆

府鎮成鴨池命金州招討使欽察部領之十二月調
西川王安撫楊總帥軍與火尼赤相合與丑漢黃元
刺同鎮守合峇之城十二年二月詔以東川新得
城寨逼近夔府恐南兵來侵發鞏昌路補僉軍三千
人戍之三月海州丁安撫等來降選五州丁壯四千
人守海州東海十三年十月命別速斛忽別列八
都兒二人爲都元帥領蒙古軍二千人河西軍一千
人守幹端城十五年三月分揚州行省兵於隆興
府初置行省分兵諸路調遣江西省軍爲最少至是
以南廣地關阻山谿之險命鐵木兒不花領兵一萬

人赴之合元帥塔出軍以備戰守四月詔以伯顏阿
木所調河南新僉軍三千人還守廬州六月命荆湖
北道宣慰使塔海調遣夔府諸軍士七月詔以塔海
征夔軍之還戍者及揚州江西舟師悉付水軍萬戶
張榮實將之守禦江中八月命江南諸路戍卒散歸
各所屬萬戶屯戍初渡江所得城池發各萬戶部曲
士卒以戍之久而亡命死傷者衆續至者多不着行
伍至是縱還各營以備屯戍安西王相府言川蜀既
平城邑山砦洞穴凡八十三所其渠州禮義城等處
凡三十三所宜以兵鎮守餘悉撤去從之九月詔發

東京北京軍四百人往戍應昌府其應昌舊戍士卒悉令散歸十一月定軍民異屬之制及蒙古軍屯戍之地先是以李壇叛分軍民為二而異其屬後因平江南軍官始兼民職遂因之凡以千戶守一郡則率其麾下從之百戶亦然不便至是令軍民各異屬如初制士卒以萬戶為率擇可屯之地屯之諸蒙古軍士散處南北及還各與魯者亦皆收聚令四萬戶所領之衆屯河北阿木二萬戶屯河南以備調遣餘丁定其版籍編入行伍俾各有所屬遇征伐則遣之十六年二月命萬戶孛朮魯敬領其麾下舊有士卒

守湖州先是以唐鄧均三州士卒二百八十八人屬敬麾下後遷戍江陵府至是還之四月定上都戍卒用本路元籍軍士國制郡邑鎮戍士卒皆更相易置故每歲以他郡兵戍上都軍士罷於轉輸至是以上都民充軍者四千人每歲令備鎮戍罷他郡戍兵六月調門魚通及黎雅諸處民戶不奉國法議以兵戍其地發新附軍五百人蒙古軍一百人漢軍四百人往鎮戍之七月以西川蒙古軍七千人新附軍三千人付皇子安西王命闍里鐵木兒以戍杭州軍六百九十人赴京師調兩淮招討小廝蒙古軍及自北方

迴探馬赤軍代之八月調江南新附軍五千駐太原
五千駐大名五千駐衛州又發探馬赤軍一萬人及
夔府招討張萬之新附軍俾四川西道宣慰使也罕
的斤將之戍幹端十七年正月詔以他令不罕守建
都布吉解守長河西之地無令遷易三月同知浙東
道宣慰司事張鐸言江南鎮戍軍官不便請以時更
易置之國制既平江南以兵戍列城其長軍之官皆
世守不易故多與富民樹黨因奪民田宅居室蠹有
司政事爲害滋甚鐸上言以爲皆不遷易之弊請更
其制限以歲月遷調之庶使初附之民得以安業也

五月命樞密院調兵六百人守居庸關南北口七月
廣州鎮戍上卒初以丞相伯顏等麾下合必赤軍二
千五百人從元帥張弘範征廣王因留戍焉歲久皆
貧困多死亡者至是命更代之復以揚州行省四萬
戶蒙古軍更戍潭州十月發砲卒千人入甘州備戰
守十二月八番羅甸宣慰司請增戍卒先是以三千
人戍八番後征亦奚不薛分摘其半至是師還宣慰
司復請益兵以備戰守從之十八年正月命萬戶
張珪率麾下往就潭州還其祖父所領高州士卒并
統之二月以合必赤軍三千戍揚州十月高麗王并

行省皆言金州合浦固城全羅州等處沿海上下與日本正當衝要宜設立鎮邊萬戶府屯鎮從之十一月詔以征東留後軍分鎮慶元上海澉浦三處上船海口十九年十二月命唐兀解於松江州郡視便宜置軍鎮戍及諭鄂州揚州隆興泉州等四省議用兵戍列城徙浙東宣慰司於温州分軍戍守江南自歸州以及江陰至三海口凡二十八所四月調揚州合必軍三千人鎮泉州又潭州行省以臨川鎮地接占城及未附黎洞請立總管府一同鎮戍從之七月以隆興西京軍士代上都戍卒還西川先是上都屯戍士

卒其奧魯皆在西川而戍西川者多隆興西京軍士每歲轉餉不勝勞費至是更之二十年八月留蒙

古軍千人戈揚州餘悉縱還揚州所有蒙古士卒九手人行省請以三分為率留一分鎮戍史塔刺渾曰

蒙古士卒悍勇孰敢當留一千人足矣從之十月發乾討虜軍千人增戍福建行省先是福建行省以其

地險常有盜負固為亂兵少不足戰守請增蒙古漢軍千人樞密院議以劉萬奴所領乾討虜軍益之

二十一年四月詔潭州蒙古軍依揚州例留一千人餘悉放還諸奧魯十月增兵鎮守金齒國以其地民

戶剛狠舊營以漢軍新附軍三千人戍守今再調探馬赤蒙古軍二千人令藥刺海率赴之二十二年二月詔改江淮江西元帥招討司為上中下三萬戶府蒙古漢人新附諸軍相參作三十七翼上萬戶宿州蘄縣真定沂鄒益都高郵泇海七翼中萬戶襄陽十字路邳州鄧州杭州懷州孟州真州八翼下萬戶常州鎮江潁州廬州亳州安慶江陰水軍益都新軍湖州淮安壽春揚州泰州弩手保甲慶州上都新軍黃州安豐松江鎮江水軍建康二十五翼每翼設達魯花赤萬戶副萬戶各一人以隸所在行院

四年五月調各衛色軍士五百人於平灤以備鎮

戍十月詔以廣東係邊徼之地山險人稀兼江西福

建賊徒聚集不時越境作亂發江西行省忽都鐵木

兒麾下軍五千人往鎮守之二十五年二月調揚

州省軍赴鄂州代鎮戍士卒三月詔黃州蘄州壽昌

諸軍還隸江淮省始三處舊置鎮守軍以近鄂州省

嘗分隸領之至是軍官以為言遂仍其舊遼陽行省

言蘄州地接賊境請益兵鎮戍從之四月調江淮行

省全翼一下萬戶軍移鎮江西省從皇子脫歡士卒

及劉二拔都麾下萬人皆散歸各營十一月增軍

四

戍咸平府以察忽亦兒思合言其地實邊徵請益兵
 鎮守以備不虞故也二十六年二月命萬戶劉得
 祿以軍五千人鎮守八番二十七年六月調各行
 省軍於江西以備鎮戍俟盜賊平息而後縱還九月
 以元帥那懷麾下軍四百人守文州調江淮省下萬
 戶府軍於福建鎮戍十一月江淮行省言先是丞相
 伯顏及元帥阿木阿塔海等守行省時各路置軍鎮
 戍視地之輕重而為之多寡厥後忙古解代之悉更
 其法易置將吏士卒殊失其宜今福建盜賊已平惟
 刺東一道地極邊惡賊所聚宜請復還三萬戶以鎮

守之合刺帶一軍戍公海明台亦怯烈一軍戍溫康

札忽帶一軍戍紹興婺州其寧國徽州初用土兵後

皆與賊通今盡遷之江北更調高郵泰州兩萬戶漢

軍戍之揚州建康鎮江三城跨據大江人民繁會置

七萬戶府杭州行省諸司府庫所在置四萬戶府水

戰之法舊止十所今擇瀕海沿江要害二十二所分

兵閱習伺察諸盜錢塘控扼海口舊置戰艦二十艘

今增置戰艦百艘海船二十艘樞密院以聞悉從之

二十八年二月調江淮省探馬赤軍及漢軍二千人

於脫歡太子側近揚州屯駐二十九年以咸平府

東京所屯新附軍五百人增戍女直地三十年正月詔西征探馬赤軍八千人分留一千或二千餘令放還皇子奧魯赤大王木伯言切恐軍散釁生宜留四千還四千從之五月命思播黃平鎮遠拘刷亡宋避役手號軍人以增鎮守七月調四川行院新附軍一千人戍松山

成宗元貞元年七月樞密院官奏劉二拔都兒言初鄂州省安置軍馬之時南面止是潭州等處後得廣西海外四州八番洞蠻莽地疆界闊遠關少戍軍復增四萬人今將元屬本省四翼萬戶軍分出軍力減

少臣等謂劉二拔都兒之言有理雖然江南平定之時沿江安置軍馬伯顏阿朮阿塔海阿里海牙阿剌罕等俱係元經攻取之人又與近臣月兒魯孛羅等樞密院官同議安置者乞命通軍事知地理之人同議增減安置庶後無弊從之二年五月江淞行省言近以鎮守建康太平保定萬戶府全翼軍馬七千二百一十二名調屬湖廣省乞分兩淮戍兵於本省公海鎮邊樞密院官議沿江軍馬係伯顏阿朮安置勿令改動止於本省元管千戶百戶軍內發兵鎮守之制可九月詔以兩廣海外四州城池戍兵歲一更

代往來勞苦給俸錢選良醫往治其疾病者命三二年一更代之 三年二月調揚州翼鄧新萬戶府全翼軍馬分屯蘄黃 大德元年三月陝西平章政事悅烈伯領總帥府軍三千人收捕西番回詔留總帥軍百人及階州舊軍禿思馬軍各二百人守階州餘軍還元翼湖廣省請以保定翼萬人移鎮郴州樞密院官議此翼乃張柔所領征伐舊軍宜遷入鄂州省屯駐別調兵守之七月招收女末左右兩江屯軍千人從思明上思等處都元帥昔刺不花言也十一月河南行省言前揚州立江淮行省江陵立荆湖行省

各統軍馬上下鎮過後江淮省移於杭州荆湖省遷於鄂州黃河之南大江迤北汴梁古郡設立河南江北行省通管江淮荆湖兩省元有地面近年併入軍馬通行管領所屬之地大江最為緊要兩淮地險人頑宋亡之後始來歸順當時沿江一帶斟酌緩急安置定三十一翼軍馬鎮過後遷調十二翼前去江南餘有一十九翼於內調發止存元額十分中一二況兩淮荆襄自古隘要之地歸附至今雖即寧靜宜慮未然乞照沿江元置軍馬遷調江南翼分并各省所占本省軍人發還元翼仍前鎮邊省院官議以為沿

江安置三十一翼軍馬之說本院無此簿書問之河
南省官字魯歡其省亦無樞密院文卷內但稱至元
十九年伯顏王速鐵木兒等共擬其地安置三萬二
千軍後增二千總三萬四千今悉令各省差占及逃
亡事故者還充役足矣又字魯歡言去年伯顏點視
河南省見有軍五萬二百之上又若還其占役事故
軍人則共有七八萬人此數之外脫歡太子位下有
一千探馬赤一千漢軍阿剌八赤等哈刺魯亦在其
地設有非常皆可調用據各省占役總計軍官軍人
一萬三千八百八十一名軍官二百九名軍人一萬

三千六百七十二名內漢軍五千五百八十名新附
軍八千二百八十八名蒙古軍六十四名江洲省占役軍
官軍人四千九百五十七名湖廣省占役軍官軍人
七千六百三十三名福建省占役軍官軍人一千二百七
十二名江西省占役軍官軍人一千九百九十九名悉
令還役江洲省亦言河南行省見占本省軍人八千
八百三十三名亦宜遣還鎮邊有旨兩省各差官赴
闕辨議二年正月樞密院臣言阿剌解脫忽思所
領漢人女直高麗等軍二千一百三十六名內有稱
海對陣者有父成四五年者物力消乏乞於六衛軍

內分一千二百人大同屯田軍八百人徹里台軍二百人總二千二百人往代之制可三月詔各省合併鎮守軍福建所置者合爲五十三所江湘所置者合爲二百二十七所江西元立屯軍鎮守二百二十六所減去一百六十一所存六十四所三年三月沅州賊人嘯聚命以毗陽萬戶府鎮守辰州鎮守萬戶府鎮守沅州靖州上均萬戶府鎮守常州澧州五年三月詔河南省占役江湘省軍一萬一千四百七十二名除洪澤芍防屯田外餘令發還元翼七年四月調碭門四川軍一千人鎮守羅羅斯八年

月以江南海口軍少調蘄縣王萬戶翼漢軍一百人寧萬戶翼漢軍三百人新附軍三百人守慶元自乃顏來者蒙古軍三百人守定海

武宗至大二年七月樞密院臣言去年日本商船焚掠慶元官軍不能敵江制省言請以慶元台州公海萬戶府新附軍往陸路鎮守以蘄縣宿州兩萬戶府陸路漢軍移就公海屯鎮臣等議自世祖時伯顏阿朮等相地之勢制事之宜然後安置軍馬豈可輕動前行省忙古解等亦言以水陸軍互換遷調世祖有訓曰忙古解得非狂醉而發此言以水路之兵習陸

周伯明



P28后缺

路之伎驅步騎之士而從風水之後難成易敗於事
何補今欲禦備茲究莫若從宜於水路沿海萬戶府
新附軍三分取一與陸路蘄縣萬戶府漢軍相參鎮
守從之 四年十月以江浙省嘗言兩浙沿海瀕江
隘口地接山諸蕃海寇出沒兼收附江南之後三十餘
年承平日久將驕卒惰帥領不得其人軍馬安置不
當乞斟酌衝要去處遷調鎮遏樞密院官議慶元與
日本相接且為倭商焚毀宜如所請其餘遷調軍馬
事關機務別議行之 七月雲南八百媳婦大小徽
里等作耗調四川省蒙古漢軍四千人命萬戶囊加

志卷第四十八

元七十一百

翰林學士李士英制修國書宋燕論撰修國書知制誥國史院編修官臣王禮等奉

勅修

兵三

馬政

西北馬多天下秦漢而下載籍蓋可考已元起朔方
俗善騎射因以弓馬之利取天下古或未之有蓋其
沙漠萬里牧養蕃息大僕之馬殆不可以數計亦一
代之盛哉世祖中統四年設群牧所隸太府監尋陞
尚牧監又陞太僕院改衛尉院院廢立太僕寺屬之

宣徽院後隸中書省典掌御位下大幹耳朶馬其牧地東越耽羅北踰火里禿麻西至甘肅南暨雲南等處凡一十四處自上都大都以至玉你伯牙折連怯呆兒周迴萬里無非牧地馬之群或千百或三五十左殺烙以官印號大印子馬其印有兵古貶古闊卜川月思古幹藥等名牧人曰哈赤哈刺赤有千戶百戶父子相承任事自夏及冬隨地之宜行逐水草十月各至本地朝廷歲以九月十月遣寺官馳驛閱視較其多寡有所產駒即烙印取勘收除見在數目造案古四回漢字文冊以聞其總數蓋不可知也凡病

死者三則令牧人償大牝馬三三則賞二歲馬一一則償牝羊一其無馬者以羊羸牛折納太廟祀事暨諸寺影堂用乳酪則供牝馬駕仗及宮人出入則供尚乘馬車駕行幸上都太僕卿以下皆從先驅馬出健德門外取其肥可取乳者以行汰其羸瘦不堪者還于群自天子以及諸王百官各以脫羅氈置撒帳為取乳室車駕還京師太僕卿先期遣使徵馬五十醞都來京師醞都者承乳車之名也既至俾哈赤哈刺赤之在朝為卿大夫者親秣飼之日釀黑馬乳以奉玉食謂之細乳每醞都牝馬四十每牝馬一富給

芻一束菽八升駒一給芻一束菽五升菽貴則其半
 以小稻充自諸王百官而下亦有馬乳之供醞都如
 前之數而馬減四之一謂之粗乳芻粟要旬取給於
 度支寺官亦以旬詣閑廐肥瘠又自世祖而下山
 陵各有醞都取馬乳以供祀事號金陵擠馬越五年
 盡以與守山陵使者凡御位下正宮位下隨朝諸色
 目人負甘肅土畜耽羅雲南占城蘆州河西亦奚卜
 薛和林幹難怯魯連阿刺忽馬乞哈刺木連亦乞里
 思亦思渾察成海阿察脫不罕折連怯呆兒等處草
 地內及江南腹裏諸處應有係官養生馬牛驢騾羊

馬數之處一十四道牧地各千戶百戶等名目如左

東路折連怯呆兒等處 王你伯牙上都周圍

哈刺木連等處 阿刺忽馬乞等處 幹斤川等

處 阿察脫不罕 甘州等處 左手永平等處

右手固安州等處 雲南亦奚卜薛 蘆州 益

都 火里禿麻 高麗 耽羅國

一折連怯呆兒等處御位下 折連怯呆兒地哈刺

赤千戶買買買的撒台怯兒八思闊闊來塔失鐵

木兒哈刺那海伯要觶也兒的思撒的迷失教化

太鐵木兒塔都也先木薛肥不思塔八不見都麻

失不顏台撒敦 按赤忽里哈赤千戶下百戶脫
脫木兒 兀魯兀內土阿八刺哈赤闊闊出 徹
徹地撒刺八 薛裏溫你里溫幹脫忽赤哈刺鐵
木兒 哈思罕地僧家奴 玉你伯牙斲頭山百
戶哈只

一玉你伯牙等處御位下 玉你伯牙地哈刺赤百
戶忽兒秃哈兀都蠻燕鐵木兒暗出忽兒也先秃
滿王龍鐵木兒月思哥明里不蘭
大幹身朶位下 乞刺里郭羅赤馬某等 哈里
牙兒苟赤別鐵木兒 伯只刺苟赤阿藍答兒

阿察兒伯顏苟赤教化的等 塔魯內亦兒哥赤
塔里牙赤莽 伯只刺阿塔赤忽兒秃哈 挑出
太師月赤察兒分出鐵木兒等 伯顏只魯干阿
塔赤秃忽魯等 玉你伯牙奴秃赤火你赤
一塔刺木連等處御位下 阿失溫忽都地八都兒
希徹秃地吉兒解 哈察木敦 火石腦兒哈塔
咬羅海牙撒的 換撒里真按赤哈荅 須知忽
都哈刺赤別乞 軍腦兒哈刺赤火羅思 玉龍
鞞徹 雲內州拙里牙赤昌罕 察罕腦兒欠昔
思 棠樹兒安魯罕 石頭山秃忽魯 牙不罕

三
你里温脫脫木兒 開城路黑水河不花

大幹耳朶位下完者

一 阿刺忽馬兒等處御位下 阿刺忽馬乞地哈刺

赤百戶按不憐乾鐵哥火石鐵木兒末赤卯罕不

蘭奚孛羅罕 怯魯連地哈刺赤千戶床八失百

戶怯兒的小薛干別鐵列不魯孛羅串都也速與

列坦的里也里迷失忙兀爾 幹難地蘭盞兒末

者哈只不花等

大幹耳朶位下 阿刺忽馬乞按灰等 闊苦地

闊赤斤等

一 幹斤川等慶御位下 幹斤川地哈刺赤千戶月

魯阿刺鐵木兒塔塔塔察兒 拙里牙赤幹羅孫

馬塔哈兒哈地哈刺赤千戶當失燕忽里歡差太

難 闊闊地兀奴忽赤忙兀爾 怯魯連八刺哈

赤八兒麻思

大幹耳朶位下 馬塔哈兒哈怯連口只兒哈忽

一 阿察脫不罕等處御位下 阿察脫不罕地哈赤

守納 幹川札馬昔寶赤忙哥撒兒 火羅罕按

赤禿忽赤 成海後火義罕塔兒罕按赤也先

黃兀兒不刺按赤末兒哥忽林失 應里哥地按

赤哈丹忽台迷失 應吉列古哈刺赤不魯 亦

兒渾察西哈刺赤 荅蘭速魯哈刺赤八只吉兒

哈兒哈孫不刺哈刺赤阿兒禿

大幹耳朶位下 怯魯連火你赤塔刺海

一甘州葦處御位下 口孛子哈刺不花一所 奧

魯赤一所 阿刺沙阿蘭山兀都蠻 亦不刺金

一所 寬徹干 塔塔安地普安 勝回地劉子

總管 闊闊思地 太鐵木兒等 甘州葦處楊

住普 撥可連地撒兒吉思 只哈禿屯田地安

童一所 哈刺班忽都拙思牙赤耳眉

一左手永平等處御位下 永平地哈刺赤千戶六

十 樂亭地拙里牙 赤阿都赤荅刺赤迷里迷失

亦兒哥赤馬某撒兒荅 香河按赤定住亦馬赤

速哥鐵木兒 河西務愛牙赤孛羅解 朔州哈

刺赤脫忽察 桃花島昔寶赤赤班等

大幹耳朶位下 河西務王提赤百戶馬札兒

一右手固安州四怯薛 八刺哈赤平章那懷為長

固安州哈刺赤脫忽察哈赤忽里哈赤按赤不都

兒 真定昔寶赤脫脫 左衛哈刺赤塔不斛

青州哈刺赤阿哈不花 涿州哈刺赤不魯哈思

三十
一雲南亦奚卜薛鐵木兒不花為長

蘆州

益都哈刺赤忽都鐵木兒
火里禿麻太勝忽兒為長

高麗耽羅

屯田

古者寓兵於農漢魏而下始置屯田為守邊之計有
國者善用兵法則亦養兵息民之要道也國初用兵
征討遇堅城大敵則必屯田以守之海內既一於是
內而各衛外而行省皆立屯田以資軍餉或國古之

制或以地之宜其為慮益甚詳密矣大抵句陂洪澤
甘肅瓜沙因人之制其地利益不減於舊和林陝
西四川等地則因地之宜而肇為之亦未嘗遺其利
焉至於雲南八番海南海北雖非屯田之所而以爲
蠻夷腹心之地則又因制兵屯旅以控扼之由是而
天下無不可屯之兵無不可耕之地矣今故著其建
置增損之槩而內外所轄軍民屯田各以次列焉

樞密院所轄

左衛屯田 世祖中統三年三月調樞密院二千人
於東安州南永清縣東荒土及本衛元占牧地立屯

開耕分置左右手屯田千戶所為軍二千名為田一千三百一十頃六十五畝

右衛屯田 世祖中統三年三月調本衛軍二千人

於永清益津等處立屯開耕分置左右手屯田千戶所其屯軍田畝之數與左衛同

中衛屯田 世祖至元四年於武清香河等縣置立

十一年以各屯地界相去百餘里往來耕作不便遷於河西務荒莊楊家口青臺楊家白等處其屯軍之

數與左衛同為田一千三十七頃八十二畝

前衛屯田 世祖至元十五年九月以各省軍入備

侍衛者於霸州保定涿州荒閑地土屯種分置左右

手屯田千戶所屯軍與左衛同為田一千頃

後衛屯田 置立歲月與前衛同後以永清等處田

畝低下遷昌平縣之太平莊恭定三年五月以太平莊乃世祖經行之地營盤所在春秋往來牧放衛士

頭匹不宜與漢軍立屯遂罷之止於舊立屯所耕作

如故屯軍與左衛同為田一千四百二十八頃一十

四畝

武衛屯田 世祖至元十八年發迤南軍人三千名

於涿州霸州保定定興等處置立屯田分設廣備萬

益等六屯別立農政院以領之二十二年罷農政院
 為司農寺自後與民相參屯種二十五年別立屯田
 萬戶府分管屯種軍人二十六年以屯軍屬武衛親
 軍都指揮使司兼領屯田事仁宗皇慶元年改屬衛
 率府後復歸之武衛英宗至治元年命以廣備利民
 二千戶軍人所耕地土與左衛率府忙古解屯田千
 戶所互相更易屯軍三千名為田一千八百四頃四
 十五畝

左翼屯田萬戶府世祖至元二十六年二月罷蒙
 古侍衛軍從人之屯田者別以斡端別十八里回還

漢軍及大名衛輝兩翼新附軍與前後二衛迤東邊
 戍士卒合併屯田設左右翼屯田萬戶府以領之遂
 於大都路霸州及河間等處立屯開耕置漢軍左右
 手二千戶新附軍六千戶所為軍二千五十一名為
 田千三百九十九頃五十二畝

右翼屯田萬戶府其置立歲月與左翼同成宗大德
 元年十一月發真定軍人三百名於武清縣崔黃口
 增置屯田仁宗延祐五年四月立衛率府以本府屯
 田併屬詹事院後復歸之樞密分置漢軍千戶所三
 別置新附軍千戶所一為軍一千五百四十人為田

六百九十九頃五十畝

忠翊侍衛屯田 世祖至元二十九年十一月命各

萬戶府摘大同隆興太原平陽等處軍人四千名於

燕只哥赤斤地面及紅城周迴置立屯田開耕荒田

二千頃仍命西京宣慰司領其事後改立大同等處

屯儲萬戶府以領之成宗大德十一年改侍衛親軍

都指揮使司仍領屯田武宗至大四年以黃華領新

附屯田軍一千人併歸本衛別立屯署是年改大同

侍衛為中都威衛屬之徽政院分屯軍二千置弩軍

翼止以二千人分置左右手屯田千戶所黃華領新

附軍屯如故仁宗延祐二年遷紅城屯軍於古北口

太平莊屯種五年復僉中都威衛軍八百人於左都

威衛所轄地內別立屯署七年十二月罷左都威衛

及太平莊白草營等處屯田復於紅城周迴立屯仍

屬中都威衛英宗至治元年始改為忠翊侍衛屯田

如故為田二千頃後移置屯所不知其數

左右欽察衛屯田 世祖至元二十四年發本衛軍

一千五百一十二名分置左右手屯田千戶所及欽

察屯田千戶所於清州等處屯田英宗至治二年始

分左右欽察衛以左右手屯田千戶所分屬之文宗

天曆二年創立龍朔侍衛復以隸馬為軍左手千戶所七百五名右手千戶所四百三十七名欽察千戶所八百名為田左手千戶所一百三十七頃五十畝右手千戶所二百一十八頃五十畝欽察千戶所三百頃

左衛率府屯田 武宗至大元年六月命於大都路鄴州武清縣及保定路新城縣置立屯田英宗至治元年以武衛與左衛率府屯田地界相離隔絕不便耕作命以兩衛屯地互更易之分置三翼屯田千戶所為軍三千人為田一千五百頃

宗仁衛屯田 英宗至治二年八月發五衛漢軍二千人於大寧等處創立屯田分置兩翼屯田千戶所為田二千頃
宣忠扈衛屯田 文宗至順元年十二月命收聚訖一萬幹羅斯給地一百頃立宣忠扈衛親軍萬戶府屯田依宗仁衛例

大農司所轄

永平屯田總管府 世祖至元二十四年八月以北京採取材木百姓三千餘戶於灤州立屯設官署以領其事為戶三千二百九十為田一萬一千六百一

十四頃四十九畝

營田提舉司 不詳其建置之始其設立處所在大

都鄒州之武清縣為戶軍二百五十三民一千二百

三十五祈忌放良四百八十不蘭奚二百三十三火

者一百七十口獨居不蘭奚一十二口黑瓦木丁八

十二名為田三千五百二頃九十三畝

廣濟署屯田 世祖至元二十二年正月以崔黃口

空城屯田歲澇不收遷於清澹寺處後大司農寺以

尚珍署舊領屯夫二百三十五戶歸之既又遷濟南河

五百五十戶平灤真定保定三路屯夫四百五十

戶併入本屯為戶共一千二百三十為田一萬二千

六百頃三十八畝

宣徽院所轄

淮東淮西屯田打捕總管府 世祖至元十六年募

民開耕連海州荒地官給禾種自備牛具所得子粒

官得十之四民得十之六仍免屯戶徭役屢欲中廢

不果二十七年所轄提舉司一十九處併為十二其

後再併止設八處為戶一萬一千九百四十三為田

一萬五千一百九十三頃三十九畝

豐閭署 世祖至元二十二年創立於大都路薊州之

豐閏縣為戶八百三十七為田三百四十九頃

寶坻屯 世祖至元十六年僉大都屬邑編民三百

戶立屯於大都之寶坻縣為田四百五十頃

尚珍署 世祖至元二十三年置立於濟寧路之堯

州為戶四百五十六為田九千七百一十九頃七十

二畝

腹裏所轄軍民屯田

大同等處屯儲總管府屯田 成宗大德四年以西

京黃華嶺等處田土頗廣發軍民九千餘人立屯開

耕六年始設屯儲軍民總管萬戶府十一年放罷漢

軍還紅城屯所止存民夫在屯仁宗時改萬戶府為

總管府為戶軍四千二十民五千九百四十五為田

五千頃

虎賁親軍都指揮使司屯田 世祖至元十七年十

二月月兒魯官人言近於滅捏怯土赤納赤高州忽

蘭若班等處改置驛傳臣等議可於舊置驛所設立

屯田從之二十八年發虎賁親軍二千人入屯二十

九年增軍一千凡立三十四屯於上都置司為軍三

千人佃戶七十九為田四千二百二頃七十九畝

嶺北行省屯田 世祖至元二十一年併和林阿刺

解元領軍一千人入五條河成宗元貞元年摘六衛漢軍一千名赴稱海屯田大德三年以五條河漢軍悉併入稱海仁宗延祐三年罷稱海屯田復立屯於五條河六年分揀蒙古軍五千人復屯田稱海七年命依世祖舊制稱海五條河俱設屯田發軍一千人於五條河立屯英宗時立屯田萬戶府為戶四千六百四十八為田六千四百餘頃

遼陽等處行中書省所轄屯田

大寧路海陽等處打捕屯田所世祖至元二十三年以大寧遼陽平樂諸路拘刷漏籍放良李蘭奚人

戶及僧道之還俗者立屯於瑞州之西瀕海荒地開耕設打捕屯田總管府成宗大德四年罷之止立打捕屯田所為戶元撥并召募共一百二十二為田二百三十頃五十畝

浦峪路屯田萬戶府世祖至元二十九年十月以蠻軍三百戶女直一百九十戶於咸平府屯種三十年命本府萬戶和魯古解領其事仍於茶刺罕刺憐等處立屯三十一年罷萬戶府屯田仁宗大德二年撥蠻軍三百戶屬肇州蒙古萬戶府止存女直一百九十戶依舊立屯為田四百頃

金復州萬戶府屯田 世祖至元二十一年五月發
新附軍一千二百八十一戶於忻都察置立屯田二
十六年分京師應役新附軍一千人屯田哈思罕關
東荒地三十年以玉龍帖木兒塔失海牙兩萬戶新
附軍一千三百六十戶併入金復州立屯耕作爲戶
三千六百四十一爲田二千五百二十三頃
肇州蒙古屯田萬戶府 成宗元貞元年七月以乃
顏不魯古赤及打魚水達達女直等戶於肇州旁近
地開耕爲戶不魯古赤二百二十戶水達達八十戶
歸附軍三百戶續增漸丁五十二戶

河南行省所轄軍民屯田

南陽府民屯 世祖至元二年正月詔孟州之東黃
河之北南至八柳樹枯河徐州等處凡荒閑地上可
令阿木阿刺罕等所領士卒立屯耕種并摘各萬戶
所管漢軍屯田六年以攻襄樊軍餉不足發南京河
南歸德諸路編民二萬餘戶於唐鄧申裕等處立屯
八年散還元屯戶別僉南陽諸色戶計立營田使司
領之尋罷改立南陽屯田總管府後復罷止隸有司
爲戶六千四十一爲田一萬六百六十二頃七畝
洪澤萬戶府屯田 世祖至元二十三年立洪澤南

北三屯設萬戶府以統之先是江淮行省言國家經費糧儲為急今屯田之利無過兩淮况勺陂洪澤皆漢唐舊嘗立屯之地若令江淮新附漢軍屯田可歲得糧百五十餘萬石至是從之三十一年罷三屯萬戶止立洪澤屯田萬戶府以統之其置立處所在淮安路之白水塘黃家疇等處為戶一萬五千九百九十名為田三萬五千三百一十二頃二十一畝乃陂屯田萬戶府世祖至元二十一年二月江淮行省言安豐之芍陂可溉田萬餘頃乞置三萬人立屯中書省議發軍士二千人始試行之後屯戶至一

萬四千八百八名

德安等處軍民屯田總管府

世祖至元十八年以

各翼取剋漢軍及各路拘收手號新附軍分置十屯立屯田萬戶府三十一年改立總管府為民九千三百七十五名軍五千九百六十五名為田八千八百七十九頃九十六畝

陝西等處行中書省所轄軍民屯田

陝西屯田總管府世祖至元十一年正月以安西

王府所管編民二千戶立櫟楊涇陽終南渭南屯田十八年立屯田所十九年以軍站屯戶拘收為怯憐

口戶計放還而無所歸者籍為屯戶立安西平涼屯
田設提領所以領之二十九年立鳳翔鎮原彭原屯
田放罷至元十年所僉接應成都延安軍人置立民
屯設立屯田所尋改為軍屯令千戶所管領三十年
復更為民屯為戶鳳翔一千一百二十七戶鎮原九
百一十三戶櫟楊七百八十六戶後存六百五十八戶
涇陽六百九十六戶後存六百五十八戶彭原一千
二百三十八戶安西七百二十四戶後存二百六十
二戶平涼二百八十八戶終南七百七十一戶後存
七百一十三戶渭南八百一十一戶後存七百六十

六戶為田鳳翔九十頃一十二畝鎮原四百二十六
頃八十五畝櫟陽一千二十頃九十九畝涇陽一千
二十頃九十九畝彭原五百四十五頃六十八畝安
西四百六十七頃七十八畝平涼一百一十五頃二
十畝終南九百四十三頃七十六畝渭南一千二百
二十二頃三十一畝

陝西等處萬戶府屯田 世祖至元十九年二月以
盤屋南係官荒地發歸附軍立孝子林張馬村軍屯
二十年以南山把口子巡哨軍人八百戶於盤屋縣
之杏園莊寧州之大昌原屯田十一年發文州鎮

成新附軍九百人立亞栢鎮軍屯復以燕京戍守新
 附軍四百六十三戶於德順州之威戎立屯開耕為
 戶孝子林屯三百一戶張馬村屯三百一十三戶杏
 園莊屯二百三十三戶大昌原屯四百七十四戶亞
 栢鎮屯九百戶威戎屯四百六十三戶為田孝子林
 二十三頃八十畝張馬村七十三頃八十畝杏園莊
 一百一十八頃三十畝大昌原一百五十八頃七斗
 九畝亞栢鎮二百六十八頃五十九畝威戎一百六
 十四頃八十畝
 赤延安總管府屯 世祖至元十九年以拘收賣

身故良不蘭奚及漏網戶計於延安路探馬赤草地

屯田為戶二千二十七為田四百八十六頃

甘肅等處行中書省所轄軍民屯田

寧夏等處新附軍萬戶府屯田 世祖至元十九年

三月發迤南新附軍一千三百八十二戶往寧夏等

處屯田二十一年遣塔塔裏千戶所管軍人九百五

十八戶屯田為田一千四百九十八頃三十三畝

管軍萬戶府屯田 世祖至元十八年正月命肅州

沙州瓜州置立屯田先是遣都元師劉恩往肅州諸

郡視地之所宜恩還言宜立屯田遂從之發軍於甘

州黑山子滿峪泉水渠鴨子翅等處立屯爲戶二千二百九十爲田一千一百六十六頃六十四畝

寧夏營田司屯田 世祖至元八年正月僉發已未

年隨州鄂州投降人民一千一百七戶往中興居住十一年編爲屯田戶凡二千四百丁二十三年續僉漸丁得三百人爲田一千八百頃

寧夏路放良官屯田 世祖至元十一年從安撫司

請以招收放良人民九百四戶編聚屯田爲田四百

四十六頃五十畝

亦集乃屯田 世祖至元十六年調歸附軍人於甘

州十八年以充屯田軍二十二年遷甘州新附軍二

百人往屯亦集乃合即渠開種爲田九十一頃五十

畝

江西等處行中書省所轄屯田

贛州路南安寨兵萬戶府屯田 成宗大德二年正

月以贛州路所轄信豐會昌龍南安遠等處賊人出

沒發寨兵及募舊役弓手與抄數漏籍人戶立屯耕

守以鎮遏之爲戶三千二百六十五爲田五百二十

四頃六十八畝

江浙等處行中書省所轄

汀漳屯田 世祖至元十八年以福建調軍糧儲費用依腹裏例置立屯田命管軍總管鄭楚莘發鎮守士卒年老不堪備征戰者得百有十四人又募南安等縣居民一千八百二十五戶立屯耕作成宗元貞三年命於南詔黎畚各立屯田摘撥見戍軍人每屯置一千五百名及將所招陳弔眼等餘黨入屯與軍人相參耕種為戶汀州屯一千五百二十五名漳州屯一千五百一十三名為田汀州屯二百二十五頃漳州屯二百五十頃

高麗國立屯

高麗屯田 世祖至元七年創立是時東征日本欲積糧餉為進取之計遂以王縛洪茶丘等所管高麗戶二千人及發中衛軍二千人合娑娑府咸平府軍各一千人於王京東寧府鳳州等一十處置立屯田設經略司以領其事每屯一用軍五百人

四川行省所轄軍民屯田二十九處

廣元路民屯 世祖至元十三年從利路元帥言廣元實東西兩川要衝支給以治繁經理係官田畝得九頃六十畝遂以褒州刷到無主人口偶配為十戶立屯開種十八年發新得州緡民七十七戶屯田為戶

共八十七

叙州宣撫司民屯 世祖至元十一年命西蜀四川

經略使起立屯田十五年命長寧軍富順州等處編

民四百七十五戶立屯耕種十九年續僉一百六十

戶二十年叙州僉民一千九百戶二十五年富順州

復僉民六百八十八戶增入舊屯二十七年取勘析出屯

戶得二百八十四成宗元貞二年復放罷站戶一千

一十七戶依舊屯田總之為戶四百四十四

紹慶路民屯 世祖至元十九年於本路兼當差民

戶內僉二十三各置立屯田二十年於彭水縣籍管

萬州寄戶內僉撥二十戶二十一年僉彭水縣未當

差民戶三十二戶增入二十六年屯戶貧乏者多負

逋復僉彭水縣編民一十六戶補之為戶九十一

嘉定路民屯 世祖至元十九年命亡宋編民四戶

置立屯田成宗元貞元年撥成都義士軍八戶增入

為戶一十二

順慶路民屯 世祖至元十二年僉順慶民三千四

百六十八戶置立屯田十九年復於民戶內差撥一

千三百二十六戶置民屯二十年復僉二百二十二

戶增入總之五千一十六戶

潼川府民屯 世祖至元十一年僉本府編民及義士軍二千二百二十四戶立屯十三年復僉民一百四十二戶二十一年行省遣使於遂寧府擇監夫之老弱廢疾者得四十六戶僉充屯戶總之二千四百一十二戶

夔路總管府民屯 世祖至元十一年置累僉本路

編民至五千二十戶續於新附軍內僉老弱五十戶增入

重慶路民屯 世祖至元十一年置累於江津巴縣

瀘州忠州等處僉撥編民二千三百八十九戶并色

共三千五百六十六戶

成都路民屯 世祖至元十三年僉陰陽人四十戶

辦納屯糧二十二年續僉瀘州編民九千七戶充屯

田戶三十一年續僉千戶高德所管民一十四戶

保寧萬戶府軍屯 世祖至元二十六年保寧府言

本管軍人一戶或二丁三丁父兄弟應役實為重

併若又遷於成都屯種去家隔遠逃匿必多乞令本

府在營士卒及夔路守鎮軍人止於保寧沿江屯種

從之僉軍一千二百名二十七年發屯軍一百二十

九人從萬戶也速迭兒西征別僉漸丁軍人入屯為

戶一千三百二十九名為田一百一十八頃二十七畝

叙州等處萬戶府軍屯 成宗元貞二年改立叙

州軍屯遷遂寧屯軍二百三十九人於叙州宣化縣

喞口上下荒地開耕為田四十二頃八十三畝

重慶五路守鎮萬戶府軍屯 仁宗延祐七年發軍

一千二百人於重慶路三堆中槽稍市等處屯耕為

田四百二十頃

夔路萬戶府軍屯 世祖至元二十一年從四川行

省議除沿邊重地分軍鎮守餘軍一萬人命官於成

都諸處擇膏腴地立屯開耕為戶三百五十一人為

田五十六頃七十畝凡創立十四屯

成都等路萬戶府軍屯於本路崇慶州義興鄉楠木

園置立為戶二百九十九人為田四十二頃七十畝

河東陝西等路萬戶府軍屯 置立於灌州之青城

陶坝及崇慶州之大冊頭等處為戶一千一百二十

八名為田二百八頃七畝

廣安等處萬戶府軍屯 置立於成都路崇慶州之

七寶坝為戶一百五十五名為田二十六頃二十五畝

保寧萬戶府軍屯 置立於重慶州晉源縣之金馬

為戶五百六十四名為田七十五頃九十五畝

叙州萬戶府軍屯 置立於灌州之青城為戶二百
二十一名為田三十八頃六十七畝

五路萬戶府軍屯 置立於成都路崇慶州之大柵

鎮孝感鄉及灌州青城縣之懷仁鄉為戶一千一百

六十一名為田二百三頃一十七畝

與元金州等處萬戶府軍屯 置立於崇慶州晉源

縣孝感鄉為戶三百四十四名為田五十六頃

隨路八都萬戶府軍屯 置立於灌州青城溫江縣

為戶八百三十二名為田一百六十二頃五十七畝

舊附等軍萬戶府軍屯 置立於灌州青城縣崇慶

州等處為戶一千二名為田一百二十九頃五十畝

砲手萬戶府軍屯 置立於灌州青城縣龍池鄉為

戶九十六名為田一十六頃八十畝

順慶軍屯 置立於晉源縣義興鄉江源縣將軍橋

為戶五百六十五名為田九十八頃八十七畝

平楊軍屯 置立於灌州青城崇慶州大柵頭為戶

三百九十八名為田六十九頃六十五畝

遂寧州軍屯為戶二千名為田三百五十頃

嘉定萬戶府軍屯 世祖至元二十一年摘家古漢

軍及嘉定新附軍三百六十八於崇慶州青城等處

屯田二十八年還之元翼止餘屯軍一十三名為田二頃二十七畝

順慶等處萬戶府軍屯。世祖至元二十六年發軍於松江下流漢初等處屯種為戶六百五十六名為田一百一十四頃八十畝

廣安等處萬戶府軍屯。世祖至元二十七年撥廣安舊附漢軍一百一十八名於新明等處立屯開耕為田二十頃六十五畝

雲南行省所轄軍民屯田一十二處。威楚提舉司屯田。世祖至元十五年於威楚提舉

臨西使司拘刷漏籍人戶充民屯本司就領其事與中原之制不同為戶三十三為田一百六十五雙

大理金齒等處宣慰司都元帥府軍民屯。世祖至

元十二年命於所轄州縣拘刷漏籍人戶得六千六十有六戶置立屯田十四年僉本府編民四百戶益之十八年續僉永昌府編民一千二百七十五戶增入二十六年立大理軍屯於爨焚軍內撥二百戶二十七年復僉爨焚軍人二百八十一戶增入二十八

年續增一百一十九戶總之民屯三千七百四十一戶軍屯六百戶為田軍民已業二萬二千一百五雙

鶴慶路軍民屯田 世祖至元十二年僉鶴慶路編

民一百戶立民屯二十七十年僉慶軍一百五十二

戶立軍屯為田軍屯六百八雙民屯四百雙俱已業

武定路總管府軍屯 世祖至元二十七年以雲南

戍軍糧餉不足於和曲得勸二州慶軍內僉一百

八十七戶立屯耕種為田七百四十八雙

威楚路軍民屯田 世祖至元十二年立威楚民屯

拘刷本路漏籍人戶得一千一百一戶內八百六十

六戶官給無主荒田四千三百三十雙餘戶自備已

業田一千一百七十五雙二十七年始立屯軍於本

路慶軍內僉三百九十九戶內一十五戶官給荒

田六十雙餘戶自備已業田一千五百三十六雙

中慶路軍民屯田 世祖至元十二年置立中慶民

屯於所屬州縣內拘刷漏籍人戶得四千一百九十

七戶官給田一萬七千二十二雙自備已業田二千

六百二雙二十七年始立軍屯用慶軍人七百有

九戶官給田二百三十四雙自備已業田二千六百

一雙

曲靖等處守慰司兼管軍萬戶府軍民屯田 世祖

至元十二年立曲靖路民屯拘刷所轄州郡諸色漏

籍人戶七百四十一戶立屯十八年續僉民一千五百
 戶增入其所耕之田官給一千四百八十雙自備已
 業田三千雙十二年立激江民屯所僉屯戶與曲靖
 同凡一千二百六十戶二十六年始立軍屯於爨棘
 軍內僉一百六十九戶二十七年復僉一百二十六
 戶增入十二年立仁德府民屯所僉屯戶與激江同
 凡八十戶官給田一百六十雙二十六年始立軍屯
 僉爨棘軍四十四戶二十七年續僉五十六戶增入
 所耕田畝四百雙俱係軍人已業
 烏撒宣慰司軍民屯田 世祖至元二十七年立烏

撒路軍屯以爨棘軍一百二十四戶屯田又立東川
 路民屯屯戶亦係爨棘軍人八十六戶皆自備已業
 臨安宣慰司兼管軍萬戶府軍民屯田 世祖至元
 十二年立臨安民屯二處皆於所屬州縣拘刷漏籍
 人戶開耕宣慰司所管民屯三百戶田六百雙本路
 所管民屯二千戶田三千四百雙二十七年續立爨
 棘軍屯為戶二百八十八為田一千一百五十二雙
 梁千戶翼軍屯 世祖至元三十年梁王遣使詣雲
 南行省言以漢軍一千人置立屯田三十一年發三
 百人備鎮戍巡邏止存七百人於烏蒙屯田後遷於

新興州為田三千七百八十九雙

羅羅斯宣慰司兼管軍萬戶府軍民屯田 世祖至

元二十七年立會通民屯屯戶係爨棘土軍二戶十

六年立建昌民屯撥編民一百四戶二十三年發爨

爨軍一百八十戶立軍屯是年又立會川路民屯發

本路所轄州邑編民四十戶十六年立德昌路民屯

發編民二十一戶二十年始立軍屯發爨棘軍人一

百二十戶

烏蒙等處屯田總管府軍屯 仁宗延祐三年立烏

蒙軍屯先是雲南行省言烏蒙乃雲南咽喉之地別

無屯戍軍馬其地廣闊土瘠膏腴皆有古昔屯田之

蹟乞發畏吾兒及新附漢軍屯田鎮遏至是從之為

戶軍五千人為田一千二百五十頃

湖廣等處行中書省所轄屯田三處

海北海南道宣慰司都元帥府民屯 世祖至元三

十年召募民戶并發新附士卒於海南海北等處置

立屯田成宗元貞元年以其地多瘴癘縱屯田軍二

千人還各翼留二千人與召募民之屯種大德三年

罷屯田萬戶府屯軍 沁令還役止令民戶八千四百

二十八戶屯田瓊州路五千一十一戶雷州路一千

五百六十六戶高州路九百四十八戶化州路八百
四十三戶廉州路六十戶為田瓊州路二百九十二
頃九十八畝雷州路一百六十五頃五十一畝高州
路四十五頃化州路五十五頃二十四畝廉州路四
頃八十八畝

廣西兩江道宣慰司都元帥撞兵屯田 成宗大德
二年黃聖許叛逃之交趾遺棄水田五百四十五頃
七畝部民有呂瑛者言募牧蘭茅處及融度溪洞徑
撞民丁於上浪忠州諸處開屯耕種十年平大任洞
賊黃德寧等以其地所遺田上續置藤州屯田為戶

上浪屯一千二百八十二戶忠州屯六百一十四戶
那扶屯一千九戶雷留屯一百八十七戶水口屯一
千五百九十九戶續增藤州屯二百八頃一十九畝
湖南道宣慰司衡州等處屯田 世祖至元二十五
年調德安屯田萬戶府軍士一千四百六十七名分
置衡州之清化永州之烏符武岡之白倉置立屯田
二十七年募衡陽縣無土產居民得九戶增入清化
屯為戶清化屯軍民五百九戶烏符屯軍民五百戶
白倉屯同為田清化屯一百二十頃一十九畝烏符
屯一百三頃五十畝白倉屯八十六頃九十二畝

志卷第四十八

志卷第四十九

元史一百一

翰學士韋不剌制誥兼修國史吳汝翰待制聖直監知制誥兼國史院編修官臣孫德芳奉

勅修

兵四

站赤

元制站赤者驛傳之譯名也蓋以通達邊情布宣號令古人所謂置郵而傳命未有重於此者焉凡站陸則以馬以牛或以驢或以車而水則以舟其給驛傳璽書謂之鋪馬聖旨遇軍務之急則又以金字圓符為信銀字者次之內則掌之天府外則國人之為長

官者主之其官有驛令有提領又置脫脫禾孫於關會之地以司辨詰皆總之於通政院及中書兵部而站戶闕乏逃亡則又以時僉補且加賑卹焉於是四方往來之使止則有館舍頓則有供帳饑渴則有飲食而梯航畢達海宇會同元之天下視前代所以爲極盛也今故者其驛政之大者然後紀各省水陸凡若干站而遼東狗站亦因以附見云

太宗元年十一月敕諸牛鋪馬站每一百戶置漢車一十具各站俱置米倉站戶每年一牌內納米一石令百戶一人掌之北使臣每日支肉一斤麵一斤米

一升酒一觥四年五月諭隨路官負并站赤人等使臣無牌面文字始給馬之驛官及元差官皆罪之有文字牌面而不給驛馬者亦論罪若係軍情急速及送納顏色絲線酒食米粟駁匹鷹隼但係御用諸物雖無牌面文字亦驗數應付車牛

世祖中統四年三月中書省定議乘坐驛馬長行馬使臣從人及下文字吏刺解子人等分例乘坐驛使臣換馬處正使臣支粥食餅渴酒從人支粥宿頓處正使臣白米一升麵一斤酒一升油鹽雜支鈔一十文冬月一行日支炭五斤十月一日爲始正月三十日

終往支從人白米一升麵一斤長行馬使臣賣聖旨
令旨及省部文字幹當官事者其一二居長人負支
宿頓分例次人與粥飯仍支給馬一匹草一十二斤
料五升十月為始至三月三十日終止白米一升麵
一斤油鹽雜用鈔一十文投呈公文曳刺解子依部
擬宿頓處批支五月雲州設站戶取迤南州城站戶
籍內選堪中上戶應當馬站戶馬一匹牛站戶牛二
隻於各戶選堪當站後之人不問親驅每戶取二丁
及家屬於立站去處安置 五年八月詔站戶貧富
不等每戶限四頃除免稅石以供鋪馬祇應馬山地

畝全納地稅 至元六年二月詔各道憲司如總管
府例每道給鋪馬劄子三道 七年正月省部官定
議各路總府在城驛設官二員於見役人負內選用
州縣驛設頭目二名如見役人即是相應站戶就令
依上任事不係站戶則就本站馬戶內別行選用除
脫脫禾孫依舊存設隨路見設總站官罷之十一月
立諸站都統領使司往來使臣令脫脫禾孫盤問
八年正月中書省議鋪馬劄子初用蒙古字各處站
赤未能盡識宜繪畫馬匹數目復以省印覆之庶無
疑惑因命令後各處取給鋪馬標附文籍其馬匹數

付驛史房書寫畢就左右司用墨印印給馬數日省
 印印訖別行附籍發行墨印左右司封掌 九年八
 月諸站都統領使司言朝省諸司局院及外路諸官
 府應差馳驛使臣所贖劄子從脫脫禾孫辨詰無脫
 脫禾孫之脫令總管府驗之 十一年十月命隨處
 站赤直隸各路總管府其站戶家屬令元籍州縣管
 領 十三年正月改諸站都統領使司為通政院命
 降鑄印信 十七年二月詔江淮諸路增置水站除
 海青使臣及事干軍務者方許馳驛餘者自濟州水
 站為始並今乘船往來 十八年閏八月詔除上都

榆林迤北站赤外隨路官錢不須支給驗其閑劇景
 增站戶協力自備首思當站 十九年四月詔給各
 處行省鋪馬聖旨揚州行省鄂州行省泉州行省隆
 興行省占城行省安西行省四川行省西夏行省甘
 州行省每省五道南方驗田糧及七十石者准當站
 馬一匹九月通政院臣言隨路站赤三五戶共當正
 馬一匹十三戶供車一輛自備一切什物公用近年
 以來多為諸王公主及正宮太子位下頭目識認招
 收或冒入投下戶計者遂致站赤損弊乞換補站戶
 從之十月增給各省鋪馬聖旨西川京兆泉州十道

甘州中興各五道 二十年二月和林宣慰司給鋪馬聖旨二道江淮行省增給十道都省遣使繁多亦增二十道給之七月免站戶和顧和買一切雜泛差役仍令自備首思十一日增給甘州行省鋪馬聖旨十道總之為二十道十二月增各省及轉運司宣慰司鋪馬聖旨三十五道江淮行省十道四川行省十道安西轉運司分司二道荆湖行省所轄湖南宣慰司三道福建行省十道 二十一年二月增給各處鋪馬劄子荆湖占城等處本省一十道荆湖北道宣慰司二道所轄路分一十六處每處二道山東運司

二道河間運司七道宣慰司德府三道江西行省五道福建行省所轄路分七處每處二道司農司五道四川行省所轄順元路宣慰司三道思州播州兩處宣撫司各三道都省二十道 四月定增使臣分例正使宿頓支米一升麵一斤羊肉一斤酒一升柴一束油鹽雜支增鈔二分通作三分經過減半從者每名支米一升經過減半九月給阿里海牙所治之省鋪馬聖旨十道所轄宣慰司二處各三道 二十二年四月給陝西行省并各處宣慰司行工部等處鋪馬劄子一百二十六道 二十三年四月福建東京兩行省

各給圓牌二面與魯去出使交趾先給圓牌二面今
再增二面於脫歡太子位下給發南京行省起馬三
十匹給圓牌二面初立三處宣慰司給劄子起馬三
十匹二十四年四月增給尚書省鋪馬聖旨一百
五十道并先給降一百五十道共三百道五月揚州
省言徐州至揚州水馬站兩各分置夏月水潦使臣
勞苦請徙馬站附併水站一處安置馳驛者白日馬
行夜則經由水路况站戶皆是水濱居止者庶幾官
民兩便從之七月給中興路陝西行省廣東宣慰司
以不丁等官鋪馬聖旨二十三道二十五年正月

腹裏路分三十八處年銷祇充數增給鈔三千

九百八十一錠併元額七千一百六十九錠總中統

鈔一萬一千一百五十錠分上下半年給降二月命

南方站戶以糧七十石出馬一匹為則或十石之下

八九戶共之或二三十石之上兩三戶共之惟求稅

糧僅足當站之數不至多餘却免其一切雜泛差役

若有納糧百石之下七十石之上自請獨當站馬一

匹者聽之五月增給遼陽行省鋪馬劄子五道十一

月福建行省元給鋪馬聖旨二十四道增給劄子六

道二十六年正月給光祿寺鋪馬劄子四道二月從

沿海鎮守官蔡澤言以舊有水軍二千人於海道置
立水站三月給海道運糧萬戶府鋪馬聖旨五道四
月四川紹慶路給鋪馬劄子二道成都府六道龍興
行省增給鋪馬聖旨五道太原府宣慰司及儲峙提
舉司給降二道八月給遼東宣慰司鋪馬聖旨五道
大理金齒宣慰司四道九月增給西京宣慰司鋪馬
劄子五道江淮行省所轄浙東道宣慰司三道紹興
路總管府給降二道甘肅行省所轄亦集乃總管府
沙州肅州三路給六道十一月增給甘肅行省鋪馬
聖旨七道二十七年正月增給陝西行省鋪馬聖

旨五道二月都省增給鋪馬聖旨一百五十道江淮
行省一十五道六月給營田提舉司鋪馬聖旨二道
九月江淮行省所轄徽州路水道不通給鋪馬聖旨
二道二十八年六月隨處設站官二員大都至上都
都置司吏三名餘設二名祇應頭目攢典各一名站
戶及百者設百戶一名七月詔各路府州縣達魯花
赤長官依軍戶例兼管站赤與魯非奉通政院明文
不得擅科差役十二月增給省除之任官鋪馬聖旨
三百五十道二十九年三月命通政院分官四員
於江南四省整理站赤給印與之三十年正月南

丹州洞蠻來朝立安撫司於其地給鋪馬聖旨二道
三月兩淮都轉運鹽使司增給鋪馬聖旨起馬五匹
五月給淘金運司鋪馬聖旨起馬五匹大司農司起
馬二十匹六月江浙行省言各路近運站船若止以
六戶供船一艘除苗不過十四五石力寡不能當役
請令各路除苗不過元額二十四石自六戶之上或
至十戶通融會撥從之八月給劉二拔都兒圓牌三
面鋪馬聖旨一十五道十月增給濟南府鹽運司鋪
馬聖旨一道三十一年六月給福建運司鋪馬聖
旨起馬五匹

成宗大德八年正月御史臺臣言各處站赤合用祇
應官錢多不依時撥降又或數少不給遂令站戶輪
當庫子陪備應辦莫若驗使臣起數實支官錢所在
官司依時撥降令各站提領收掌祇待毋得科配小
民似為便益詔都省定議行之十年從江浙省言
命站官仍領祇待選站戶之有餘糧者以充庫子止
設一名上下半年更代就准本戶里正主首身役
武宗至大三年五月給嘉興松江瑞州三路及汴梁
等處管民總管府鋪馬聖旨各三道四年三月詔
拘收各衙門鋪馬聖旨命中書省定議以聞省臣言

始者站赤隸兵部後屬通政院今通政院怠於整治
站赤消乏合依舊命兵部領之制可四月中書省臣
又言昨奉旨以站赤屬兵部今右丞相鐵木迭兒等
議漢地之驛命兵部領之其鐵烈干納隣末隣等處
蒙古站赤仍付通政院帝曰何必如此但今罷通政
院悉隸兵部可也閏七月復立通政院領蒙古站赤
八月詔大都至上都每站除設驛令丞外設提領三
員司吏三名腹裏路分衝要水陸站赤設提領二員
司吏二名其餘閑慢驛分止設提領一員司吏一名
如無驛令量擬提領二員每一百戶設百戶一名從

拘該路府州縣提調正官於站戶內選用三歲為滿
充濫設官吏頭目人等盡罷之十一月給中政院鋪
馬聖旨二十道

仁宗皇慶二年四月增給陝西行臺鋪馬聖旨八道
六月中書省臣言典瑞監掌金之圓牌及鋪馬聖旨
三百餘道至大四年九聖旨皆納之于翰林院以金
字圓牌不敷增置五十面蓋圓牌造使初為軍情大
事而設不宜濫給自今求給牌面不經中書省樞密
院者宜勿與從之 延祐元年十月沙瓜州立屯儲
總管萬戶府給鋪馬聖旨六道 五年十月中書省

部言各站設置提領止受部劄行九品印職專車馬
 之後所領站赤多者三二千少者五七百戶比之軍
 民體非輕細柰何俸祿不給三年一更貪邪得以自
 縱今擬各處館驛除今丞外見役提領不許交換從
 之 七年四月詔蒙古漢人站依世祖舊制悉歸之
 通政院十一月從通政院官請詔腹裏江南漢地站
 赤依舊制命名各路達魯花赤總管提調州縣官勿得
 預
 泰定元年三月遣官賑給帖里干木憐納憐等一百
 一十九站鈔二十一萬三千三百錠糧七萬六千二

百四十四石八斗北方站赤每加津濟至此為最盛

中書省所轄腹裏各路站赤總計一百九十八處

陸站一百七十五處馬一萬二千二百九十八匹

車一千六十九輛牛一千九百八十二隻驢四千

九百八頭 水站二十一處船九百五十隻馬二

百六十六匹牛二百隻驢三百九十四頭羊五百

口 牛站二處牛三百六隻車六十輛

河南江北等處行中書省所轄總計一百七十九處

該一百九十六站 陸站一百六處馬三千九百
 二十八匹車二百一十七輛牛一百九十二隻驢

五百三十四頭 水站九十處船一千五百一十二隻

遼陽等處行中書省所轄總計一百二十處

馬六千五百一十五匹車二千六百二十一輛牛

五千二百五十九隻

狗站一十五處元設站戶三百狗三千隻後除絕

云例死外實在站戶二百八十九狗二百一十八

隻

江浙等處行中書省所轄總計二百六十二處

馬站一百三十四處馬五千一百二十三匹 轎

站三十五處轎一百四十八乘 步站二十一處

通運夫三十三十二戶 水站八十二處船一千

六百二十九隻

江西等處行中書省所轄總計一百五十四處

馬站八十五處馬二百六十五匹轎二十五

乘 水站六十九處船五百六十八隻

湖廣等處行中書省所轄總計一百七十三處

陸站一百處馬二千五百五十五匹車七十輛牛

五百四十五隻坐轎一百七十五乘卧轎三十乘

水站七十三處船五百八十隻

陝西行中書省所轄八十一處

陸站八十處馬七千六百二十九匹 水站一處

船六隻

四川行中書省所轄

陸站四十八處馬九百八十六匹牛一百五十頭

水站八十四處船六百五十四隻牛七十六頭

雲南諸路行中書省所轄站赤七十八處

馬站七十四處馬二千三百四十五匹牛三十隻

水站四處船二十四隻

甘肅行中書省所轄三路

脫脫木孫馬站六處馬四百九十一匹 牛一百四

十九頭驢一百七十一頭羊六百五十口

弓手

元制郡邑設弓手以防盜也內而京師有南北兩城兵馬
司外而諸路府所轄州縣設縣尉司巡檢司捕盜所皆置
巡軍弓手而其數則有多寡之不同職巡邏專捕獲官
有綱運及流徙者至則執兵仗導送以轉相授受外此
則不敢役示專其職焉

世祖中統五年隨州府驛路設置巡馬及馬步弓手驗民
戶多寡定立額數除本管頭目外本處長官兼充提控

官其夜禁之法一更三點鐘聲絕禁人行五更三點鐘聲動
聽人行有公事急速及喪病產育之類則不在此限違
者笞二十七下百官者笞七下准贖元寶鈔一貫州縣城池
相離遠處其間五七十里所有村店及二十戶以上者設立巡
防弓手合用器仗必須完備令本縣長官提調不及二十戶
者依數差捕若無村店去處或五七十里創立聚落店舍亦
須及二十戶數其巡軍別設不在戶數之內關津渡口必當
設立店舍弓手去處不在五七十里之限於本路不以是何投
下當差戶計及軍站人匠打捕鷹房幹脫窰冶諸色人等戶
內每一百戶內取中戶一名充役與免本戶合著差發其當

戶推到合該差發數目却於九十九戶內拘攤若有失盜
勒令當該弓手定立二限盤捉每限一月如限內不獲其
捕盜官強盜停俸兩月竊盜一月外擗弓手如一月不
獲強盜決二十七下竊盜七下兩月不獲強盜二十七下竊
盜一十七下三月不獲者強盜三十七下竊盜二十七下如
限內獲賊數及一半者全免正罪至元三年首部議隨
路戶數多寡不同兼軍站不該差發似難拘攤擬合斟
酌京府同縣合用人數止於本處包銀絲線并止納包
銀戶計內每一百戶選差中戶一名當役本月合當差
發稅銀卻令九十九戶包納從之四年除上都中都已

有巡軍其所轄州縣合設弓手俱於本路包銀等戶選
丁多強壯者充驗各處州縣戶數多寡驛程繁慢設置
合用器仗各人自備八年御史臺言諸路宜選年壯熟
閑弓馬之人以備巡捕之職弓手數少者亦宜增置除
捕盜防轉不得別行差占十六年分大都南北兩城兵
馬司各主捕盜之任南城三十二處弓手一千四百名
北城一十七處弓手七百九十五名二十三年省臺官
言捕賊巡馬先令執持悶棍以行賊衆多有弓箭反致
巡軍被傷今議給各路弓箭十副府州七副司縣五副
各令置備防盜從之仁宗延祐二年從江南行御史臺

請以各處弓手人等往往致害人命役三年者罷之
還當民役別於相應戶內補換

急遞鋪兵

古者置郵而傳命示速也元制設急遞鋪以達四方
文書之往來其所繫至重其立法蓋可考焉世祖時
自燕京至開平府復自開平府至京兆始驗地里遠
近人數多寡立急遞站鋪每十里或十五里二十五
里則設一鋪於各州縣所管民戶及漏籍戶內僉起
鋪兵中統元年詔隨處官司設傳遞鋪驛每鋪置鋪
丁五人各處縣官置文簿一道付鋪遇有轉遞文字

當傳鋪所即注名件到鋪時刻及所轄轉遞人姓名
置簿令轉送人取下鋪押字交收時刻還鋪本縣官
司時復照刷稽滯者治罪其文字本縣官司緝袋封
記以牌書號其牌長五寸闊一寸五分以綠油黃字
書號若係邊關急速公事用匣子封鎖於上重別題
號及寫某處文字發遣時刻以憑照勘遲速其匣子
長一尺闊四寸高三寸用黑油紅字書號已上牌匣
俱係營造小尺上以寸字文為號仍將本管地境置
立鋪驛卓望地名通和傳報鋪兵一晝夜行四百里
各路總管府委有俸正官一員每季親行提點州縣

亦委有俸末職正官上下半月照刷如有怠慢初犯
事輕者笞四十贖銅再犯罰俸一月三犯者決總管
府提點官比總管減一等仍科三十初犯贖銅再犯
罰俸半月二犯者決鋪兵鋪司痛行斷罪至元八年
申命州縣官用心照刷及點視闕少鋪司鋪兵凡有
通轉文字到鋪司隨即分明附籍速令當該鋪兵畏
以軟緝包袱更用油緝捲縛夾版束繫費小回曆一
本作急走通到下鋪交割附曆訖於回曆上令鋪司
驗到鋪時刻并文字總計角數及有無開抹磨擦損
壞或亂行批寫字樣如此附寫一行鋪司畫字回還

若有違犯易爲挨問隨路鋪兵不許顧人領替須要
本戶少壯人力正身應役每鋪安置十二時輪子一
枚紅綽屑一座并牌額及上司行下諸路申上鋪曆
二本每遇夜常明燈燭其鋪兵每名備夾版鈴攀各
一付纓槍一軟絹包袱一油絹三尺蓑衣一領回曆
一本各處往來文字先用淨檢紙封裹於上更用厚
夾紙印信封皮各路承發文字人吏每日逐旋發放
及將承發到文字驗視有無開拆磨擦損壞批寫字
樣分朗附簿九年左補嗣祖上福合言諸路急遞鋪
名不合人情急者急速也國家設官署名字必須吉

祥者爲美宜更定之遂更定急遞鋪二十年留守司
官言初立急遞鋪時取不能當差貧戶除其差發充
鋪兵又不敷者於漏籍戶內貼補今富人規避差發
永充鋪兵乞擇其富者令充站戶站戶之貧者却充
鋪兵從之二十八年中書省定議近年入遞文字封
緘雜亂發遣無時今後省部并諸衙門入遞文字其
常事皆付承發司隨所投下去處類爲一緘如往江
淮行省者凡江淮行省不以是何文字通爲一緘其
他官府同省部臺院凡有急速之事別置匣子發遣
其匣子入遞隨到即行鋪司須能附寫文曆辨定時

刻鋪兵須壯健善走者不堪之入隨即易換三十一
年大都設戶總急遞鋪提領所降九品銅印設提領
三員英宗至治三年各處急遞鋪每十鋪設一郵長
於州縣籍記司吏內差充使之專督其事一歲之內
能盡職者從優補用不能者提調官量輕重罪之凡
鋪卒皆腰革帶懸鈴持槍挾雨衣燮文書以行夜則
持炬火道狹則車馬者負荷者聞鈴避諸旁夜亦以
驚虎狼也響及所之鋪則鋪人出以俟其至囊板以
護文書不破碎不壞積積小漆絹以禦雨雪不使濡
濕之及各鋪得之則又展轉遞去

鷹房捕獵

元制自御位及諸王皆有昔寶赤蓋鷹人也是故捕
獵有戶使之致鮮食以薦宗廟供天庖而齒革羽毛
又皆足以備用此殆不可闕焉者也然地有禁取有
時而違者則罪之冬春之交天子或親幸近郊縱鷹
隼搏擊以爲游豫之度謂之飛放故鷹房捕獵皆有
司存而打捕鷹房人戶多取析居放良及漏籍字蘭
奚還俗僧道與凡曠役無賴者及招收亡宋舊役等
戶爲之其差發除納地稅商稅依例出軍等六色宣
課外並免其雜泛差役自太宗乙未年抄籍分屬御

位下及諸王公主駙馬各投下及世祖時行尚書省嘗重定其籍厥後永為定制焉

御位下打捕鷹房官 一所權官張元大都路寶坻

縣置司元額七十七戶 一所王阿都赤世襲祖

父職掌十投下中都順天真定宣德等路諸色人

匠打捕等戶元額一百四十七戶 一所管領大

都等處打捕鷹房民戶達魯花赤石抹也先世襲

祖父職元額一百一十七戶 一所管領大都路

打捕鷹房等官李脫歡帖木兒世襲祖父職元額

二百二十八戶 一所宣授管領大都等處打捕

鷹房人匠等戶達魯花赤黃也速鮮兒世襲祖父

職元額五十戶 一所管領鷹房打捕人匠等戶

達魯花赤移刺帖木兒世襲祖父職元額一百五

十七戶 一所宣授管領打捕鷹房等戶達魯花

赤阿八赤世襲祖父職元額三百五十五戶 一

所宣授管領大都等路打捕鷹房人戶達魯花赤

寒食世襲祖父職元額二百四十三戶

諸王位下 汝寧王位下管領民匠打捕鷹房等戶

官元額二百一十戶 普賽因大王位下管領本投

下大都等路打捕鷹房諸色人匠達魯花赤都總

管府元額七百八十七戶

天下州縣所設獵戶 腹裏打捕戶總計四千四百

二十三戶 河東宣慰司打捕戶五百九十八戶

晉寧路打捕戶三百三十二戶 大同路打捕戶

一十五戶 翼寧路打捕戶二百五十一戶 上

都留守司打捕戶三百九十七戶 宣德提領所

打捕戶一百八十二戶 山東宣慰司打捕戶三

百九十七戶 宣德提領所打捕戶一百八十二

戶 山東宣慰司打捕戶一百戶 益都路打捕

戶四十三戶 濟南路打捕戶三十六戶 般陽

路二十一戶 東平路三十四戶 曹州八十四

戶 德州一十戶 濮州三十一戶 泰安州五

戶 東昌路一戶 真定路九十一戶 順德路

一十九戶 廣平路一十九戶 冠州五戶 恩

州二戶 彰德三十七戶 衛輝路一十六戶

大名路二百八十六戶 保安路三十一戶 河

間路二百五十二戶 隨路提舉司一千一百九

十一戶 河間鷹房府二百七十六名 都總管

府七百五十六戶

遼陽大寧等處打捕鷹房官捕戶七百五十九戶

東平等路打捕鷹房官捕戶三百九戶 隨州德

安河南襄陽懷孟等處打捕鷹房官捕戶一百七

十二戶 叔捕提領所捕戶四十戶 高麗鷹房

總管捕戶二百五十戶 河南等路打捕鷹房官

捕戶一千一百四十二戶 益都等處打捕鷹房

官捕戶五百二十一戶 河北河南東平等處打

捕鷹房官捕戶三百戶 隨路打捕鷹房總管捕

戶一百五十九戶 真定保定等處打捕鷹房官

捕戶五十戶 淮安路鷹房官捕戶四十七戶

揚州等處打捕鷹房官捕戶七十二戶

宣徽院管轄淮東淮西屯田打捕總管府司屬打

捕衙門提舉司十處千戶所一處總一萬四千三

百二戶 淮安提舉司八百五十八戶 安東提

舉司九百一十二戶 招泗提舉司四百六十五

戶 鎮巢提舉司二千五百四十戶 蘄黃提舉

司一千一百一十二戶 通泰提舉司七百四十

九戶 塔山提舉司六百四十四戶 魚網提舉

司二千五百一十九戶 打捕手號軍上千戶所

打捕軍六百四戶

2443.1

1135.2



志卷四十九

六十六

東山

二

東山

